



Uunga/

Inatsisartut Aningaasaqarnermut Ataatsimiititaliaat

AA-p AIS2015-mut – konto pingaarnermi immikkoortunut 20-24-mut
apeqqutaanut akissutit

26-03-2015

2. 2. Oqaasertaliussat (TA) (27/3 nal. 14.00)

Apeqqut:

P. O. Box 1037
3900 Nuuk
Oqarasuaat +299 34 50 00
Nassitsigasuaat (+299) 34 63
50
E-mail: oed@nanoq.gl
www.nanoq.gl

2.1. Siunertamut kontumut 20.10-mut Suliniutit immikkut siunertallit

Taarsigassarsinnaaneq pillugu maleruagassanik sukumiinerusunik Naalakkersuisut aalajangersaasinnaasut oqaasertaliussami allassimavoq. Piginnaatitsissut tamanna atorineqarsimava tamatumunngalu atatillugu suut isumaliutigineqarsimappat?

Akissut:

Naalakkersuisut 2014-mi nutaanik taarsigassarsinngillat. Nunatta Karsiata akiitsui tamarmiusut DKR-imi aamma €-mi taarsigassarsiarineqartut allanngoratik 600 mio. kr.-iupput, taarsigassarsiallu Sisimiuni aamma Ilulissani erngup nukinganik nukissiorfiit ilaannakuusumik aningaasalersornissaannut taarsigassarsiarineqarlutik. Taarsigassarsinissaq pillugu maleruagassanik nutaanik aalajangersaasoqanngilaq. Taarsigassarsineq Missingersuusionermermi malittarisassani, immikkoortoq 10.2-mi maleruagassatigut aalajangersarneqarpoq aamma Aningaasaqarnermut Naalakkersuisoqarfimmit isumagineqarluni. Missingersuusionermermi malittarisassat naapertorlugit taarsigassarsiniarnerit suulluunniit, tassunga ilanngullugit ingerlatsinermermi allalluunniit taarsigassarsinermermi atortunik pilersitsinerit, qitiusumik Aningaasaqarnermut Nunamullu Namminermt Naalakkersuisoqarfimmi, maannakkut Aningaasaqarnermut Naalakkersuisoqarfimmi suliarineqartarput.

Apeqqut:

2.2. Konto pingaarneq 20.30.07 Ineqarnermut tapersiissuteqartarneq, erniat akilersuutillu, ilanngaaseriikkat

- a) *Danskisuuani nassuiaatini immikkoortut pingajuanni oqaaseqatigiinni siullerni oqaaseq ataaseq amigaataasorinarpoq. Immikkoortut pingajuat ima aallarnerneqassasoq ataatsimiititaliamit ilimagineqarpoq: Disse poster, hensættelser og afskrivninger påvirker regnskabets statusdel ...*

Apeqquut:

b) Nassuiaatini qupperneq 27-mi immikkoortoq 4 aamma 5 suli atuuttuusut Naalakkersuisut naliliippat?

Akissut:

Apeqquut a aamma b ataatsimoortillugit akineqarput.

Oqaasertaliussat aamma oqaasertaliussanut nassuiaatit taakkuusariaqarput aningaasanut inatsimmi 2014-mi allanneqarsimasut.

AIS2015-ip aappassaaneerneqarneranut atatillugu Aningaasaqarnermut Naalakkersuisoqarfik allannguutissanik siunnersuusiussaaq.

Apeqquut:

2.3. Kontomut pingaarnermut 30.13.07-imut Danmarkimi Kalaallillu Nunaanni inissiisarnernut aningaasanut immikkoortitanut nassuiaatit

Danskisuuani nr. 3-mi aqqissuinikkut kukkusoqarsimavoq, tassami "30.10.37 Nuna tamakkerlugu meeqqanut inuusuttunullu ulloq unnuarlu paaqqinnittarfinnut..." sioqqullugu oqaatsit "til hovedkonto" allassimmammata. Tamanna allannguutissatut siunnersuuteqarnikkut iluarsineqartariaqarpoq.

Akissut:

AIS2015-ip aappassaaneerneqarneranut atatillugu oqaasertaliussanut allannguutissatut siunnersuutit saqqummiunneqarumaarput.

Apeqquut:

Konto pingaarnermut nassuiaatit qulequtaata danskisuuani quppernerup 36-ip aallartinnerani "til hovedkonto" marlioriarluni allanneqarsimavoq. Tamanna allannguutissatut siunnersuuteqarnikkut iluarsineqartariaqarpoq.

Akissut:

AIS2015-ip aappassaaneerneqarneranut atatillugu oqaasertaliussanut allannguutissatut siunnersuutit saqqummiunneqarumaarput.

Apeqquut:

2.4. Suliassaarfik 34-mut Peqqinnissaqarfik

a) Suleqatigiinnissamik isumaqatigiissutit ilaatigut aningaasartuutit ikilisikkaat nassuiaatini allassimavoq. Suleqatigiinnissamik isumaqatigiissutit taamaattut qanoq annertutigisumik sipaaruteqaataasinnaanerat pillugu Naalakkersuisut assersuutissamik takussutissiorsinnaappat?

Akissut:

Peqqissutsimut Nunanilu Avannarlerni Suleqatigiinnermut Naalackersuisoqarfimmiit akissutitut innersuussisoqarpoq.

Apeqqut:

- b) *Kalaallit Nunaata avataani isumaginninnikkut innarluutilinnullu paaqqinnittarfinnik ukiunut arlalinnut atuuttussanik isumaqatigiissuteqarnissaq siunertaralugu isumaginninnermut tunngasuni oqaasertaliussap assinganik pisariaqartitsisoqarnersoq Naalackersuisunit isumaliutigineqarsimava?*

Akissut:

Ilaquatariinnermut, Naligiissitaanermut Isumaginninnermullu Naalackersuisoqarfimmiit akissutitut innersuussisoqarpoq.

Apeqqut:

2.5. Kontomut pingaarnermut 40.02.01-imut Ilinniagaqaqarnersiuteqartitsivik aammalu Ilinniagaqartut Ineqarfiisa Allaffeqarfiat

- a) *Ineqarnermut aningaasartuutit aningaasat nalikilliarthonerat aamma/imaluunnit atuisunut akigitinneqartut ineriartornerannut malinnaatinneqarnissaat isumaliutigineqarsimava?*

Akissut:

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfimmiit akissutitut innersuussisoqarpoq.

Apeqqut:

2.6. Kontomut pingaarnermut 64.10.25-mut Suliniutit anqisuut

- a) *Oqaasertaliussaq nr. 1 naapertorlugu aningaasat uninngasuutit kingusinnerpaamik 31/12 2018-imi nunatta karsianut utertinneqassasut Naalackersuisut siunnersuutigigaat ataatsimiititaliamit maluginiarneqarpoq. 2014-imi aningaasanut inatsimmi ulloq taaneqartoq tassaavoq 31/12 2017. Kontomut pingaarnermut 2015-imi aningaasanik allanik annertunerusumik immikkoortitsisoqannginnera eqqarsaatigalugu tamanna ima paasineqarsinnaava suliit ingerlanneqartut ukiumik ataatsimik kinguartooqqasut?*

Akissut:

Inuussutissarsiornermut, Suliffeqarnermut, Niuernermit Nunanullu Allanut Tunngasunut Naalackersuisoqarfimmiit akissutitut innersuussisoqarpoq.

Apeqqut:

2.7 Kontomut pingaarnermut 67.01.03-mut Geologi aamma nittarsaassinermut suliniutit

Kontomut pingaarnermut matumunnga oqaasertaliusseq nr. 2-mut nassuiaammi allassimavoq; Missingersuusionermi inatsisip "ataatsimut periutsit" takujuk § 4, imm. 3 kontomut pingaarnermut matumunnga tunngatillugu avaqqunneqarsinnaapput. Aningaasat qanoq amerlatigisut missingersuusionermut inatsimmi aalajangersakkami taaneqartumi naatsorsuutigisanit allaanerumik taamatut atorineqartarpat?

Akissut:

Aatsitassanut Naalackersuisoqarfimmiit akissutinut innersuussisoqarpoq.

Apeqqut:

2.8. 2.8. Kontomut pingaarnermut 72.20.10-mut Usinik assartuineq

- a) RAL-ip nunaqarfinni umiarsuaatai atorlugit nunaqarfinit usinik assartuinermit atuisut akiliutaannit qanorpiq amerlatigisut isertinneqartarpat aammalu nunaqarfinni usinik assartuineq ingerlatiinnarniarlugu aningaasartuutinit qanoq amerlatigisut atuisut akiliutaannit taakkunannga matussuserneqartarpat?
- b) Ingerlaarfinni tamani RAB-ip ingerlatsinera qanoq annertutigisooq aningaasaliissutinut akiliutinut matussuserneqartarpat?
- c) Suliassaqarfimmut tapiissutit annikillisinneqarnissaat siunertarlugu siunissami pitsanngorsaasoqarnissaanut pisariillisaasoqarnissaanullu Naalackersuisut periarfissaqartoq isumaqarpat? Imaluunniit Naalackersuisut akerlianik isumaqarpat ingerlatseqatigiiffik ima pitsaatigisumik ingerlanneqartoq RAB-ip ingerlanneqarnerani aningaasartuutit annikillisarnissaat allatulluunniit pitsanngorsaanissaq pisariaqanngitsoq?

Akissut:

Ineqarnermut, Sanaartornermut Attaveqarnermullu Naalackersuisoqarfimmiit akissummut innersuussisoqarpoq.

2. Nalinginnaasumik nassuiaatit

Apeqqut:

3.1. Imm 1, Aallarniut, qupp. 82

Aallarniummi kiisalu qupperneq 94-imi allassimavoq ungasinnerusoq eqqarsaatigalugu unammilligassagut tassaasut utoqqaat amerliartornerat inuuneqqortusiartornerlu. Pissutsit Kalaallit Nunaanni siunissami unammilligassat taakkuinnaangitsut ataatsimiititaliaq isumaqarpoq. Ataatsimiititaliap isumaa malillugu utoqqartaqarneq imaangilaq tamatigut inuiaqatigiinnut artukkersuutaasoq. Utoqqaat amerliartornerat Naalakkersuisut aningaasaqarnikkut anguniagassaannut qanoq sunniuteqartussatut Naalakkersuisunit naatsorsuutigineqarpa?

Akissut:

Soorunami pissusissamisoortumik erseqqissarneqassaaq innuttaasut utoqqaat artukkersuutaasutut isigineqassanngimmata. Naalakkersuisulli kissaatigaat ukiuni aggersuni inissisimaffiligassarput naapertorlugu inuiaqatigiinni aqqqissuussissasugut, utoqqaat amerlanerujussuannngortussaallutik taakkuninngalu pilersuisussat ikinnerulerlutik. Allat tamarmik akisussaassuseqanngitsuliernerussapput. Aamma tassaniippoq utoqqaat pillugit, kisianni aamma innuttaasut allat pillugit utoqqaat pigisaat isumalluutit misilittagaalluni pingaaruteqartut iluaqutiginiassagatsigit. Tamanna tassaasinnaavoq kajumissutsimik sulinerit imaluunniit utoqqaat suliffeqarfinni sivisunerusumik sulinissaannut kajumissaatinik pilersitsineq ilaatigut suliffeqarfinni pisortanilu utoqqaanerusunut aqqqissuussinerit aqqutigalugit. Naalakkersuisut iluarsartuusseqqilluni sulinerminnut atatillugu immikkoortumi tassani sulineq siunnerfeqartissavaat, aammalumi avaqqussinnaanatigu annertusiartuaartinneqartumik utoqqalinersiuteqalernissamut ukiut qaffatsinneqarnissaat, suliffeqarfinniiginnarnissamut periarfissaqanngitsunik utoqqaqarsinnaanera aamma eqqarsaatigalugu.

Naalakkersuisut aamma ataatsimiititaliaq isumaqatigivaat inuiaqatigiit katitigaanermikkut ineriartornerat aningaasaqarnikkut atasinnaassutsimut ajornartorsiutini kisiartaanngimmat. Inuiaqatigiit aqqqissugaanikkut arlalinnik tassunga tapertaasunik ajornartorsiuteqarput. Ilinniarfeqarnikkut aqqqissugaaneq naammaginangitsunik angusaqartitsivoq. Tamatuma kinguneraa amerlavallaartut inuussutissarsiummut piginnaalersitsisumik ilinniagaqannginnerat tamatumalu malitsigisaanik suliffeqarfinni ataavartumik inissinnissaminnut ajornartorsiuteqarlutik, naggataatigut suliffissaaleqisut amerliartortillugit, tamatuma kingunerisaanik inuuniarnikkut ajornartorsiuteqalerlutik inunnullu ataasiakkaanut inuiaqatigiinnullu aningaasartuutaasumik. Imatut aqqqissuussimavugut ataasiakkaat sulilernissaannut tamatigut kajumissaateqarnani ilaatigullu inissiaqarnermut tunngasuni tapiissutit annertoorujussuullutik, kisiannili equngasumik eqquillutik. Isumalluutit

naammangitsumik iluaqutigineqarlutik illuinnaasiortorujussuarmik inuussutissarsiutitigut aaqqissugaasimapput.

Apeqqut:

3.2. Imm 1, Aallarniut, qupp. 82

Aningaasaqarnikkut ingerlatsineq pillugu 2015-imut nalunaarusiaq nalinginnaasumik nassuiaatinut ilassutitut atuarneqassasoq Naalakkersuisut innersuussutigaat. Taassuma sapinngisamik piaartumik nassiunneqarnissaa ataatsimiititaliamit kissaatigineqarpoq.

Akissut:

Aningaasaqarnermut Naalakkersuisoqarfiup naatsorsuutigaa Aningaasaqarnikkut ingerlatsineq pillugu nalunaarusiaq sapaatip akunnerisa 13-iata imaluunniit sapaatit akunnerisa 14-iata ingerlaneranni tunniunneqassasoq.

Apeqqut:

3.3. Immikkoortoq 2, Aningaasaqarnermik naalakkersuinikkut ingerlatsineq, qupp. 84

Ukiuni aggersuni isertitatigut tunngaviit annertuumik millisinneqassasut maanna aningaasaqarnikkut inissisimanerup nassuiaatigineqarnerani allassimavoq. Tamanna itisileqqullugu Naalakkersuisut qinnuigineqarput.

Akissut:

Siullermik ukiuni kingullerni marlussunni tupanut imigassamullu akitsuutinit isertitat annertuumik appariatorsimapput, taamaanneralu ingerlaannassagunarlu. Tamatuma saniatigut naatsorsuutigineqarsinnaavoq siunissami sulisinnaasut ikiliartuinnarnerisa kingunerisaanik inuit akileraarutaannit isertitat ikinnerulernerannik kinguneqassasoq. Taamaattoqarnera annertusineqarpoq peqatigisaanik nunatsinniit allamut nuuttut ukiuni kingullerni amerlanerulersimmata. Peqatigisaanik Pituffik pillugu maannakkut suliamut ingerlasumut atasumik aningaasatigut kingunissat pillugit nalorninartorsiorneq, Nunatta Karsianut isertitatigut annertuumik kingunerlutsitsisinnaasoq. Tamatuma saniatigut ilimagineqanngilaq ukioq manna imaluunniit ukiup tulliani aatsitassarsiornermut tunngasuni annertuumik misissuilluni ingerlatsisoqarumaartoq. Pissutsit taakku pissutigalugit taamaalilluni ataatsimoortumik naliliineq tassaavoq isertitanut tunngaviusut ukiuni aggersuni ikilissasut, pissutsit taamaannerat iluarsiffingngikkutsigu.

Apeqqut

3.4. Immikkoortoq 2, Aningaasaqarnikkut ingerlatsinermi anguniakkat, qupp. 84

Aningaasaqarnikkut ingerlatsinermi piffissami sivisuneruni attassisinnaanissaq siunissami ungasinnerusumi anguniakkat marluusut aapparigaa aningaasaqarnikkut ingerlatsinermi anguniakkat nassuiaatigineqarneranni allassimavoq.

- a) *Tamanna erseqqinnerusumik nassuiaqqullugu Naalakkersuisut qinnuigineqarput.*

Akissut:

Aningaasaqarnikkut ingerlatsinermi ajoqutaasoq alla tassaavoq inuiaqatigiit aningaasaqarneranni akiliisinnaassutsikkut siuariartorneq. Naalakkersuisut attassinissamut siuariartornermullu pilersaarutissaanni siunniunneqarpoq namminersorlutik ingerlataqarfinni siuariartornissaq aamma pisortat ingerlataqarfiini iluarsaasseqqinnissaq.

Apeqqut:

- b) *Pisortat ingerlatsinerata maannakkutut aqqissugaanera siunissami aningaasalersorneqarsinnaassappat iluarsartuusseqqinnikkut iliuuserineqartariaqartunik Naalakkersuisut maannangaaq takusaqarsinnaappat?*

Akissut:

Siunissami ungasinnerusumi pisortat ingerlatsinerannik aningaasalersuinissamut pimoorussamik iliuuseqarnissap pisariaqarnera pillugu ataatsimiititaliamut Naalakkersuisut isumaqataapput. Iluarsartuusseqqinnernik suliniutinilu arlalinnik atorfissaqartitsisoqarpoq, soorlu aamma pisortat ingerlatsinerisigut aqqissuussisimanerput isornartumik misissortariaqaripput. 2015 pillugu Aningaasaqarnikkut ingerlatsineq pillugu nalunaarusiaq tamanna pillugu Naalakkersuisut eqqarsaasersuutaasa pilersaarutaasalu itinerusumik allaaserisamik imaqarpoq. 2015-ip ingerlanerani iluarsartuusseqqinnissamut pilersaarutitik assigiinngitsunut ataqatigiinneri Naalakkersuisunit erseqqissarneqassapput, tassunga ilanngullugit attassinissamut siuariartortitsinerimullu pilersaarutissami aamma ingerlataqarfinni assigiinngitsuni inatsisissatut siunnersuutinut, periusissianut suliniutinullu atatillugu.

Apeqqut:

- c) *Allassimavoq Naalakkersuisut 2015-ip ingerlanerani saqqummiunneqarumaartumik attassinissamut siuariartortitsinissamullu pilersaarusiuleruttortut. Naalakkersuisut paasissutissiippat attassinissamut siuariartortitsinissamullu pilersaarummi suliniutit siullit 2015-imut aningaasanut inatsisissatut siunnersuummi matumani takuneqarsinnaaleriissasut. Attassinissamut siuariartortitsinissamullu*

pilersaarutip takussutissartai 2015-imi aningaasanut inatsisissatut siunnersuummi sumi takuneqarsinnaassappat?

Akissut:

UPA 2015-imi siusinaartumik pensionisarneq pillugu iluarsartuusseqqinnissaq siunniunneqarpoq, aamma AIS2015-imi pisortat sipaaruteqarneri aqutigalugit siuariartornermut suliniutinut inissaqartitsinissamut ilungersuuteqartoqartoq. Tassani ukioq manna pisortat allaffeqarfianni 50 mio. kr.-inik sipaarniarqoq, 2015-imut aningaasanut inatsisissamut siunnersuutip aappassaaneerreqarneranut atatillugu piviusunngortinneqartussat. AIS 2015-mut siunnersuummi konto pingarneq 20.11.50 Aaqqissuusseqqinnerit sunniutaat aqutigalugu iluarsartuusseqqinnissamut arlalinnik suliniuteqarnissaq siunniunneqarpoq. Aaqqissuusseqqinnerit sunniutaat.

Apeqqut:

3.5. Immikkoortoq 2, Pisortat ingerlatsinerannik aqutsineranut tunngaviit, qupp. 87

Namminersorlutik Oqartussani, taassumalu ataani ingerlatsivinni aammalu ingerlatseqatigiiffinni Namminersorlutik Oqartussanit pigineqartuni Naalackersuisut aningaasarsiaqartitsinikkut pingaarnertut qanoq anguniagaqarnersut paasissutissiissutigeqqullugu Naalackersuisut qinnuigineqarput. Akissarsianut sulisunullu ajunngitsorsiasaritat pillugit ingerlatseqatigiiffiit (ilaannakortumik) Namminersorlutik Oqartussanit pigineqartut atugassarititaasa sunniuteqarfigineqarnissaannut Naalackersuisut qanoq periarfissaqarpat?

Akissut:

Naalackersuisut Siulittaasuata Naalackersuisoqarfianiit akissutinut innersuussisoqarpoq.

Apeqqut:

3.6. Immikkoortoq 3, Aningaasaqarnikkut inissisimaneq, qupp. 91

- a) *Qupp. 91-ip qeqqani oqaaseqatigiinni kingullermi allassimavoq 2008-2014-imi aningaasaqarnermi kisitsisinut pingaarnertut takussutissiami kisitsisit takutikkaat suliffissaaleqisut ukiumut agguaqatigiissillugit 2010-mit 2014-imut inunnik 1.000-it missaannik amerlisimasut. Taamatulli oqarneq takussutissiami siuliani allassimasumut akerliursorinarpoq, tassani erseqqinnerusumik allassimalluni qaffariaat ukiunut ataasiakkaanut atuunnani piffissamut tamarmut atuuttoq?*

Akissut:

Inuussutissarsiornermut, Suliffeqarnermut, Niuernermit Nunanullu Allanut Naalackersuisoqarfimmiit akissummut innersuussisoqarpoq.

Apeqqut:

Quppernermi 91-imi Naalakkersuisut allapput:

”Ukiunut tulliuuttunut aningaasartuutissani uuliasiortoqarnissaa aatsitassanilluunniit paaasoqalivinnissaa apeqqutaasorujussuuvoq. Aatsitassarsiornermut tunngasuni ingerlatat siuariortoqqilernissamut suliffissaqartitsinerulernissamullu tunngavissiviusinnaapput taakkuli iluatsinngippata aningaasaqarnikkut ingerlatat appaqqeratarsinnaapput.”

Aatsitassarsiornermi uuliasiornerit ingerlatallu qanoq annertussuseqarnissaannik naatsorsuutiginninnerit imalluunniit tamakku ingerlanneqannginnissaannik naatsorsuutiginninnerit pillugit Naalakkersuisut erseqqinnerusumik saqqummiisinnaappat?

Akissut:

Aatsitassanut Naalakkersuisoqarfimmiit akissutitut innersuussisoqarpoq.

Apeqqut:

3.7. Immikkoortoq 3, Aningaasaqarnikkut inissisimaneq, qupp. 92

Suliffissaaleqisut ikilisinneqarnissaat siunertaralugu iluarsaassinermi sanaartornermilu suliaat siuartinneqarneri pillugit ilassutitut aningaasaliissuteqarnissaaq pillugu suliaq ataatsimiititaliamit akuerineqartoq qupperneq 92-imi taaneqarpoq (IA suliaq nr.14 662). Aningaasaliissutit tamakkerlugit atorineqarsinnaasimanersut paasisutissiissutigineqassasoq ataatsimiititaliamit kissaatigineqarpoq?

Akissut:

Inuussutissarsiornermut, Suliffeqarnermut, Niuernermit Nunanullu Allanut Naalakkersuisoqarfimmiit akissutitut innersuussisoqarpoq.

Apeqqut:

3.8. Immikkoortoq 3.1, Akiitsoqarnerup nikerarnera, qupp. 93

Katillugit allanik 200 mio. kr.-inik taarsigassarsisoqaginnissaanut missingersuusiortoqartoq allassimavoq. Annertussuseq ukioq kingulleq aningaasanut inatsissatut sinnersuummi annertussutsip assigigaa ataatsimiititaliamit maluginiarneqarpoq.

Suliniutip annertunerusumik kaaviiartitsissutaasinnaalluni akilersuutitik ernianillu akilersuinermit qulakkeerisinaanissaa taarsigassarsinissamut piumasaqaataasooq

ataatsimiititaliap pitsaasutut isigaa. Akiitsoqarnerup nikerarnera ingerlatsinikkut nalinginnaasumik aningaasartuutit qaffariaateqarnerat pissutigalugu qaffariaateqassanngitsoq ataatsimiititaliaq isumaqarpoq.

- a) *Siuliani allassimasut tunngavigalugit inuiaqatigiit ukiuni kingullerni ukiunilu aggersuni ilanngaaseereerluni akiitsuusa nikerarnerat pillugu naatsumik nassuiaateqartoqassasoq kissaatigineqarpoq.*

Akissut:

2015 pillugu Aningaasaqarnikkut ingerlatsineq pillugu Naalakkersuisut nalunaarusiaanni immikkoortoq 3.2-mi Akiitsut ineriartornerini ataatsimiititaliamit ujarторneqartoq erseqqinnerusumik allaaserineqarpoq.

Apeqqut:

- b) *Suliniutit qanoq ittut taarsigassarsinikkut aningaasalersorneqartussatut Naalakkersuisunit isumaliutigineqarpat? Assersuutigalugu pisortat innissiaataanni atuisunit isertitat ukiut tallimat ataallugit isertinneqarnissaat – naatsorsuinermi tassani aningaasaliinerup kingunerisaanik pisortat karsiannut akileraarutitigut akiliutinit isertitaqarnerunissaq eqqumaffiginiarneqarsimananiluunniit - naatsorsuutigalugu kiassarnermut uuttuutunik tamanut immikkut pilersuilluni taarsersuisoqarniarnerata ataatsimiititaliamit ilisimaneqarnera tunngavigalugu apeqqut isigineqassaaq. Allatut oqaatigalugu aningaasaliineq assut orniginartog – aammalu aningaasaliineq nunatsinni pissakinnerusunut immikkut iluaqutaasussaq.*

Akissut:

Ilaatigut siunissami mittarfeqarfitsigut aaqqissugaanerup pisariaqartumik allilerneqarnissaanut taarsigassarsinikkut aningaasalersuinissamut periarfissat misissorneqassapput, soorlu aamma Nuummi containerinut umiarsualivimmik nutaamik maannakkut pilersitsisoqalersoq. Tamatumunnga aallaavusooq tassaavoq Akiitsunut aningaasalersuinerumullu periusissiami ilaasut tunngaviit, 2012-mi Inatsisartuni amerlasuunit isumaqataaffigineqartut kiisalu aningaasaqarnikkut ingerlatsineq pillugu anguniakkat tunngaviillu Naalakkersuisunit akuerineqaqammersut.

Aningaasaqarnermut Naalakkersuisoqarfik pisortat inissiaataanni attartortittakkani kiassarnermut uuttuutunik tamanut immikkut pilersuillu taarsersuisoqarniarnera pillugu ataatsimiititaliamit allaaserineqartunut inassuteqaatinut itinerusumik ilisimasaqanngilaq. Pilersaarut soqutiginarpasippoq, erseqqinnerusumik nalilersornissaanut tunngavissaqarluarluni, ilaatigut inissiat pillugit politikkip suliareqqinneranut aamma pisortat inissiaataannik attartortittakkanik aserfallatsaaliinermik kinguaattoornerup isumaginissaanut atasumik.

Atassuteqarnikkut aningaasaliinerit anginerusut tamarmik eqqarsaasersuutiginerini sulinerimi sakkutut atorнеqartussanik inuiaqatigiinnut aningaasaqarnikkut

kingunissaanik nalilersuinerup suliarinninnermik Aningaasaqarnermut Naalakkersuisoqarfik ilitersuusiorsimavoq. Iltersuummi siunertaq tassaasimavoq atassuteqarnermi pilersaarut aalajangersimasoq atuisut akiliuteqartinnerisigut imminut akilersinnaaneramik, pilersaarut inuiaqatigiit aningaasaqarnerisigut aningaasaliinerunersoq atasinnaanerannik, aamma aningaasaleeriaatsit sorliit pitsaanerpaamik iluanaaruteqartitsinerannik qulaajaanissaq. Aningaasalersueriaatsip qanoq ittuunissaanut taamaalilluni apeqqutaavoq aningaasalersueriaatsip pitsaanerpaamik iluanaaruteqartillugu naatsorsuinerit qanoq ittut anguneqarsimanersut, aamma Naalakkersuisut tungaviinik akuerineqarsimasunik eqqortitsisoq toqqarneqarluni.

Qanorluunniit pisoqaraluarpat taarsigassarsisitsineq eqqarsaatigalugu killiliussanut naleqqiullugu siunissami atassuteqarnikkut aningaasaliinerit tamarmiusut pillugit sukangasuumik pingaarnersuisoqarnissaanik pisariaqartitsisoqassaaq. Taamaalilluni attaveqarnikkut aningaasaliinerit anginerit tamarmik ataatsikkut naammassineqartussaangillat. Nunatta Karsia taamaalorsinnaangilaq imaluunniit nunatta taarsigassarsinermi qummut killiussap tamanna nammassinnaanagu.

Apeqqut:

3.9. Immikkoortoq 3.2, Kommunit aningaasaqarnerat, qupp. 94

Kommunini aningaasaqarneq tatineqartoq tamannalu inuiaqatigiit katitigaanerisigut unammilligassat peqatigalugit annertusiartussangatinneqartoq Naalakkersuisut qupperneq 94-imi paasissutissiissutigaa.

- a) *Kommuneqarfik Sermersooq aammalu Qaasuitsup Kommunia 2014-imi immikkut annertusisamik nakkutigineqartut ataatsimiititaliap ilimagaa. Tamanna Naalakkersuisut uppersarsinnaavaat?*

Akissut:

Kommunit marluk annertusisamik 2014-mi nakkutigineqalerput, tassa Kommuni Kujalleq aamma Kommuneqarfik Sermersooq. December 2014-mi Kommuneqarfik Sermersuup annertusisamik nakkutigineqarnera atorunnaarpoq. Kommuni Kujallermik annertusisamik nakkutillineq suli atuuppoq. Qaasuitsup Kommunia 2014-mi annertusisamik nakkutigineqangilaq, kisianni 2015-imi taamaattoqarsinnaalluni, tassa kommunip akiitsumi ikilisinneqarnissaanut pisussaaffimminik naammassinninnissaminik ajornartorsiuteqarmat. Matuma allannerata nalaani tamanna pillugu kommuni oqaloqatigineqarpoq.

Apeqqut:

- b) *Annertusisamik nakkutillineq aningaasaqarnermik, aningaasaqarnermik aqutsinermik imaluunniit allanik pissuteqarsimanersoq paasissutissiissutigineqassasoq ataatsimiititaliamit kissaatigineqarpoq.*

Akissut:

Kommuneqarfik Sermersuumik annertusisamik nakkutilliinermut pissutaavoq kommunip akiliisinnaassusiata naammanginnera, aamma kommuni ilaatigut tuniniarneqarsinnaanngitsunik piginneqataassutinik kiisalu attartortumiit piginnittuunermut aaqqissuussinermit aningaasat akiliisinnaassutsiminut ilanngullugit naatsorsuisimanera. Taamaaqataanik Kommuni Kujalleq annertusisamik nakkutigineqarpoq, tassa kommunip taarsigassarsiaminik Namminersorlutik Oqartussanut pisussaaffini eqqortissinnaanngimmagit aamma aningaasaqarnikkut ajortorujussuarmik siunnerfeqarluni.

Apeqqut:

- c) *Kommunit ataasiakkaat allatigut qanoq annertutigisumik akiitsoqarnersut paasissutissiissutigineqassasoq ataatsimiititaliamit kissaatigineqarpoq.*

Akissut:

Kommunit aningaasaqarnerat pillugu naatsorsuineq naapertorlugu 2014-p naanerani akiitsut imatut isikkoqarput:

- Kommuni Kujalleq 2014-p naanerani Namminersorlutik Oqartussanut 40,8 mio. kr.-inik akiitsoqarpoq. Akiitsut januar 2015-imi taarsigassarsiat pillugit Naalakkersuisut aamma Kommunip Kujalliup akornanni isumaqatigiissut malillugu aningaasanut inatsimmi konto pingaarnaq 20.10.42-mi Kommuninut taarsigassarsiaritit, akilersuinermi piffissami 2015-2020 akilersorneqassapput. Taarsigassarsisitsisoqarpoq 2010-mi aamma 2011-mi kommunimi akileraarutitigut isertitarineqartunit amerlanerungaartunik Akileraartarnermut Aqutsisoqarfimmit akileraarutinut akiliuteqarallartoqarsimanerata kingunerisaanik. Kommunip akiitsui taamaalillutik 89 mio. kr.-iupput.
- Kommuneqarfik Sermersooq 2014-p naanerani katillugit 117,590 mio. kr.-inik akiitsoqarpoq. Aningaasat taakku tassaapput aningaaserivimmiittunik annerpaamik 100 mio. kr.-inik taarsigassarsisinnaaneq kiisalu naluttarfik Malik pillugu Sanaartornermut Aningaasaateqarfimmi akiitsut sinneri 17,590 mio. kr.-it.
- Qeqqata Kommunია 2014-p naanerani taarsigassarsisimangilaq.
- Qaasuitsup Kommunია 2014-p naanerani katillugit 107,794 mio. kr.-inik akiitsoqarpoq. Aningaasat imatut agguarsimapput Grønlands BANKEN-imi 63,5 mio. kr.-inik taarsigassarsisinnaaneq, taakku saniatigut timersortarfiup kulturimullu illorsuup sanaartorneranut GrønlandsBANKEN-imi taarsigassarsiat 39,722 mio. kr.-it kiisalu Sanaartornermut Aningaasaateqarfimmi akiitsut sinneri 4,572 mio. kr.-it.

Apeqqut:

- d) *Naalakkersuisut paasititsissutigaat, kommunit aningaasaqarnikkut tatisimaneqarnerat inuiaqatigiit agguataarnerisa allaatigisaaneratigut unammilligassaq ilutigalugu alliariorinissaa naatsorsuutigisariaqartoq.*

Ataatsimiititaliap tamatuma itinerusumik nassuiaasersorneqarnissaa kissaatigaa.

Akissut:

Kommunini aningaasaqarneq tatineqartoq tamannalu inuiaqatigiit katitigaanerisigut unammilligassat peqatigalugit annertusiartussangatinneqartoq Naalakkersuisut paasissutissiissutigaa. Tamanna itisilernerqassasoq ataatsimiititaliamit kissaatigineqarpoq.

Apeqqut:

3.10. Immikkoortoq 3.2.1, Naliqissaareriaaseq ataatsimoortumillu tapiissuteqariaaseq nutaaq, qupp. 95

Qulequttat sisamat Namminersorlutik Oqartussat kommunillu akornanni isumaqatigiissutaagallartut qupperneq 95-imi taaneqarput.

a) *Kommunit tamarmik isumaqatigiinniarfigineqarsimappat?*

Akissut:

Kommunit tamarmik allaffissornikkut aqutsisoqatigiinni peqataapput tassanilu aalajangiinerit politikikkut ataqatigiissaarisunit akuerineqartarlutik. Aalajangiinerit taaneqartut kommuninit tamanit aamma politikikkut ataqatigiissaarisunit akuerineqarsimapput.

Apeqqut:

b) *Kommuninut ataatsimoortumik akileraarutip atorunnaarsinnissaa nunatta karsianut qanoq sunniuteqartussatut naatsorsuutigineqarpa?*

Akissut:

Kommuninut ataatsimoortumik akileraarutip atorunnaarsinnissaata siunertaraa paasiuminartuunermut iluaqutaanissaa. Atorunnaarsitsineq kommunimi akileraarutip qaffanneranit illuatungilerneqassaaq taamaalillunilu kommunit aningaasaqarnerannut imaluunniit Nunatta Karsianut sunniuteqartussaanani.

Apeqqut:

3.11. Immikkoortoq 3.2.1, Naliqissaareriaaseq ataatsimoortumillu tapiissuteqariaaseq nutaaq, qupp. 95

Kommuninut ataatsimoortumik akileraarut naluneqanngitsutut akileraarutitigut immikkut iluseqarpoq aammalu inummut ilanngaaticip (1987-imit 20.000 kr.-init 35.000 kr.-inut, 1992-imi 40.000 kr.-inut aammalu 2005-imi 48.000 kr.-inut) annertuumik qaffanneqarnerata kingunerisaanik kommunimi iluanaarutissaraluanut annaasanut matussutissatut naatsorsuunneqarluni. Kommuninut ataatsimoortumik akileraarummit iluanaarutit tamarmiullutik akileraarutitigut naliqissaarinerimut aaqqissuussinerimut

ilaatinneqarput – aammalu inummut ilanngaatip qaffanneqarneratigut kommunit iluanaarutissaraluanit annaasaat akileraarutitigut naligiissaanermut aaqqissuussineq aqgutigalugu kommuninut taamaalillutik utertinneqartarput. Taamaalilluni kommuninut ataatsimoortumik akileraarut peerneqarpat tamanna ataatsimut isigalugu kommunit iluanaarutissaraluaminnik annaasaqarnerannik kinguneqassasoq Aningaasaqarnermut Ataatsimiititaliaq isumaqarpoq. Aammalu iluanaarutissaraluanit annaasat taakku matussuserneqassappata kommuninut ataatsimoortumik akileraarutip atorunnaarsinneqarnerata kingunerisaanik kommunini akileraarutip procentiata qaffasinnerpaaffissaata qaffanneqarnissaa pisariaqassaaq.

a) Siuliani oqaatigineqartunut Naalakkersuisut isumaqataasinnaappat?

Akissut:

Kommuninut ataatsimoortumik akileraarutip atorunnaarsinnissaa naatsorsuutigineqarpoq kommunit akileraarusiisarnikkut qaffaaneritut ataqatigiissinneqassasoq. Taamaalilluni akileraarutit allanngortinneqarneri pineqarpoq.

Apeqqut:

b) Siuliani allassimasunut atatillugu kommuninut ataatsimoortumik akileraarutip atorunnaarsinneqarnerata ataatsimut isigalugu kommunit pissaqarluarnerusut aningaasaqarnerat pitsanngoriartissagaa aammalu kommunit aningaasaqarnikkut pissakinnerit aningaasaqarnerat ajorseriartissagaa, taattumillu kommuninut ataatsimoortumik akileraarutip atorunnaarsinneqarnissaa kommunini naligiissaarinermit iluserititap nutaap suliarineqarneranut atatillugu isiginiarneqartariaqassasoq Naalakkersuisut uppersarsinnaavaat?

Akissut:

Kommuninut ataatsimoortumik akileraarutip atorunnaarsinnissaa maannakkut naligiissaarinermit ilaavoq. Aamma kommunini inuit akileraarutaat ilaat taamaapput. Kisimiitillugu isigalugu kommuninut ataatsimoortumik akileraarutip atorunnaarsinnissaata pineqanngilaq. Akerlianilli pineqarluni paasiuminartuunerup annertunerulernissaa siunertaralugu kommuninut ataatsimoortumik akileraarutip kommuninut akileraarummut allanngortinneqarnissaa pineqarluni.

Apeqqut:

c) Kommunini naligiissaarinermit iluserititaq nutaaq pillugu Naalakkersuisut Aningaasaqarnermut Ataatsimiititaliamut ilisimatitsissuteqarnerannilli tamanna anguniarlugu suliaqarnermi qanoq pisoqarsimava?

Akissut:

Pilersaarummi aqutsisoqatigiit politikikkut ataqatigiissarisunit ulloq 11. februaarimi akuerineqarsimasoq sulinissamut pilersaarut aallaavigalugu sulipput. Ilaatigut nalunaarsukkanut tunngaviusut pitsaannerusut pissarsiarinissaat ilaatigullu ataatsimoortumik tapiissutit naligiissaarisarnerullu nutaamik

agguanneqartarnissaannut periusissaq pillugu sulinerit aallartinneqarput. Immikkoortut ilaanni nalunaarsukkatigut annertuunik unamminartoqarpoq, allanilu tunngaviit tatiginartut pissarsiarinissaat iluatsinneqarsimalluni. Aningaasat suut qanorlu amerlatigisut naligiissaarinikkut aqqissuussinermut ilaassanersut politikereit isummernissaannut tunngavissiami aqutsisoqatigiit ilusilersuipput – tassa imaappoq isertitat assigiinnigissusaannik naligiissaarineq qanoq ittoq siunnersuutigineqassanersoq. Tamatuma kingorna suna tunuliaqutaralugu aningaasat agguarneqarnissaat pillugu aqutsisoqatigiit isummernissamut tunngavissaliussapput. Naalackersuisut kommunit suleqatigalugit 2016 pillugu naligiissarinerup 2015-imi ukiup affaata siulliup ingerlanerani inissinneqarnissaa kissaatigaat. Qularnarporli immikkoortuni tamani kikkunnit tamanit tapersorneqarsinnaasumik aaqqiisoqassasoq, naak tamanna sulinermi Naalackersuisunit anguniaagaluartoq.

Apeqqut:

3.12. Immikkoortoq 3.3, Ingerlatseqatigiiffinni Namminersorlutik Oqartussani pigineqartuni annerpaani tallimani ineriartorneq ingerlateqatigeeqarnerullu ilusaa, qupp. 95

Ingerlatseqatigiiffiit anginerpaat tallimat kaaviiaartitaat uuttuutigalugit pineqartut Aningaasaqarnermut Ataatsimiititaliap ilimagaa.

c) Tapiiffiqeqatigiittarneq pillugu nalunaarusiornissamik Naalackersuisut pilersaaruteqarpat?

Apeqqut 3.12c-mut: akissut

Tapiiffiqeqatigiittarneq pillugu ukiumoortumik naatsorsuinerup suliarisarnissaa pillugu Naalackersuisut pilersaaruteqarput aamma assigiaartumik naatsorsuisarnerup qulakkeerneqarnissaa siunertaralugu ingerlatseqatigiiffinnut atassuteqassallutik. Aamma Aningaasaqarnikkut ingerlatsineq pillugu 2015-imut nalunaarusiami immikkoortoq 3.3-mut innersuussisoqarpoq.

3.12 a-b-mi kiisalu d-e-mi apeqqutit akissutissaannut Naalackersuisut Siulittaasuata Naalackersuisoqarfianit akissutininut innersuussisoqarpoq.

3.12 f-mi apeqqutininut akissutit pillugit Ineqarnermut, Sanaartornermut Attaveqarnermullu Naalackersuisoqarfimmit akissutininut innersuussisoqarpoq.

Apeqqut:

3.13. Immikkoortoq 3.5, Aalisarneq pilluq EU-mik isumaqatigiissut, qupp. 98

Paasissutissiissutigineqarpoq aalisakkat takussutissiami taaneqartut tamarmik EU-mit akuerineqarpata isumaqatigiissut piffissami 2013-2015-imi nunatta karsianut ukiumoortumik 132 mio. kr.-inik (17,8 mio. EUR) imaluunniit isumaqatigiissutip ukiuni pingasuni atuunnerani katillugit 396 mio. kr.-it missaannik isertitaqaataassasoq.

- a) Naalackersuisuusimasut taamani Aningaasaqarnermut Ataatsimiititaliamut paasissutissiipput pisassiissutit nammineq pisarinagit/tunisassiarinagit pisassiissutit isumaqatigiisummi ilaasut EU-mut tunineqarnissaat Kalaallit Nunaanni inuiaqatigiit aningaasaqarnerannut iluanaarutaanerpaassasoq. Maanna pisassiissutit akiliutillu eqqarsaatigalugit sulii taamannak naliliisoqarpa?
- b) Pisassat taaneqartut amerlatigisut EU-mit akuerineqartarnerat nalinginnaava aammalu taakku ilaat qanoq amerlatigisut EU-mit nalinginnaasumik atorluarneqartarpat?
- c) Missingersuutitut tapiissutit Kalaallit Nunaannut tunniunneqartut EU-mit siusinnerusukkut annikillineqarput, tassami tapiissutit siunertarisaat isumaqatigiisutigineqartut Kalaallit Nunaannit eqquutsinneqarsimangimmata. Ajornartorsiutip tamatuma 2015-imi 2016-imi uteqqinneqarsinnaaneranut aarleqqutissaqavissoq isumaqartoqarpa?

Akissut:

Aalisarnermut, Piniarnermut Nunalerinermullu Naalackersuisoqarfimmiit akissutitut innersuussisoqarpoq.

Apeqqut:

3.14. Immikkoortoq 4, Attassisinnaanissamut siuarsaanissamullu pilersaarut nutaaq, qupp. 99

Siuariartornermik siursaaneq arlalinnullu sammititamik aningaasaqarnermut allanngineq aaqqissuusseqqinnermi nalerassat sisamat ilaattut taaneqarput. Tassunga atatillugu Naalackersuisunit taaneqarpoq:

”Unammillersinnaassutsip pitsaanerulersinneqarneratigut aamma aatsitassarsiornerup takornariartitsisarnerullu iluanni inuussutissarsiuutinik siursaataasunik suliniuteqarnikkut isertitassanut tunngavissat annertunerulersinneqassapput.

Tamanna peqatigitillugu aalisarnermik inuussutissarsiuuteqarnerup ineriartorteqqinneqarnissaanut pitsaanagerusumik atugassaqartitsisoqalissaaq.”

- a) Assersuutigalugu takornariartitsinerup iluani aningaasaliissutit siuliani taaneqartumik siunertaqarluni aaqqissuunneqarsimasut aningaasanut inatsisissatut siunnersuutip sukortaani takuneqarsinnaava?

Akissut:

AIS15-ip ilaatut umiarsuarni takornariartaatini takonarissat Kalaallit Nunaannut angalanissaat pilerinernerulersinniarlugu takornariartaatinut ilaasunut akitsuutip appartinnissaa ilaavoq.

Ikerinnarsiorluni aalisarnermi ineriartorneq tapersersorniarlugu Tunumi Kujataanilu avaleraasartuunik biologit misissuinissaannut AIS15-imi 6,2 mio. kr.-init

immikkoortinneqarput. Taakku saniatigut aalisarnernut nutaanut periarfissaqartuni aalisakkanit allanit nalunaarsukkanik katersisoqassaaq.

Apeqqu:

- b) *Aalisarnermut inatsisissaq nutartigaaq, aningaasaqarnikkut siuariartornissamik Naalackersuisut kissaateqarnerannik qulakkeerinneqataasussaq, Naalackersuisunit qaqugu saqqummiunneqartussatut naatsorsuutigineqarpa?*

Akissut:

Aalisarnermut, Piniarnermut Nunalerinermullu Naalackersuisoqarfik ilisimatitsivoq aalisarneq pillugu inatsimmik annertuumik nutarterinerup immikkoortua siulleq 2015-imi ukiakkut ataatsimiinnermi saqqummiunneqarnissaa naatsorsuutigalugu.

Apeqqu:

- c) *Aaqqissuusseqqinnermi nalerassat Naalackersuisunit allattorneqartut annertunerusumik paasisaqarfiginissaat ataatsimiititaliamit qilanaarineqarpoq. Politikikkut oqallinneq qaqugu aallartittussatut naatsorsuutigineqarnerisq Naalackersuisut maannangaaq oqaatigisinnaavaat?*

Akissut:

I 2015 pillugu Naalackersuisut Aningaasaqarnikkut ingerlatsineq pillugu nalunaarusiaanni attassinissamut siuariartortitsinissamullu pilersaarut pillugu oqallinnermi aallartinneqareerpoq. Naalackersuisut naatsorsuutigaat attassinissamut siuariartortitsinissamullu pilersaarut ukiap ingerlanerani saqqummiunneqassasoq.

Apeqqu:

- d) *Suliami pingaarutilimmi tassani kommunit qanoq annertutigisumik peqataatilersarneqarpat?*

Akissut:

Attassinissamut siuariartortitsinissamullu pilersaarusiordermi soqutigisaqatigiit attuumassuteqartut tamarmik, tassunga ilanngullugit kommunit peqataatinnissaat Naalackersuisunit eqqumaffigineqarluinnarpoq. Tamatuma saniatigut attassinissamut siuariartortitsinissamullu pilersaarut politikikkut ataqatigiissaarisuni ataatsimiinnermi ingerlaavartumik aamma qaqilerneqartassaaq, taanna Namminersorlutik Oqartussat, KANUKOKA aamma kommunit akornanni oqalliffittut pilersinneqarsimalluni.

Apeqqu:

3.15. Immikkoortoq 5.1, Ineqarnermut tunngasut, qupp. 101

Konto pingaarnermi 20.30.09-mi, Sulisunik utaqqiisaasumik najugaqartitsisarnermut tunngasumi, takuneqarsinnaavoq ilanngaaseereerluni aningaasartuutit ukiuni missingsuusiortifiusuni maanna aalaakkaasumik inissisimasut.

- i) Tamanna aningaasartuutit taakku pissusissamittut annertussuseqarnerannut takussutissaava?*

Akissut:

Maannakkut Namminersorlutik Oqartussani utaqqiisaasumik najugaqartitsisarnermut inissiat amerlassusissannut kissaatigineqartunut naleqqiullugu pissusissamittut annertussuseqarput.

Apeqqut:

3.16. Immikkoortoq 5.2, Mittarfiit, qupp. 102

Innuttaasut takornariallu ornitassaanni nunanit tamalaanit tikinneqarsinnaasunik mittarfiliortoqarnissaata isumatusaarnerneranik Naalakkersuisut oqarnerat ataatsimiititaliamit isumaqatigineqarpoq. Naalakkersuisut paasissutissiissutigaat aningaasalersuineq akilersuutit erniallu aningaasaliinermi isertitatigut akilernerqarsinnaanissaat pillugu Naalakkersuisut tunngavii eqqarsaatigalugit pisortanit taarsigassarsinikkut pisinnaasoq.

- a) Suliniutit inuiaqatigiit aningaasaqarnerat eqqarsaatigalugu akilersinnaassuseqarlutillu akisussaassuseqartumik ingerlanneqarnissaannik Angallanneq pillugu Isumalioqatigiissitat kaammattuutaannut piumasaqaat kingullertut taaneqartoq qanoq ililluni sanilliunneqarsinnaanersaq paasissutissiissutigineqassasoq ataatsimiititaliamit kissaatigineqarpoq?*
- b) Isummersuutit siuliani taaneqartut aallaavigalugit mittarfeqarfiit sorliit ataatsimut isigalugu maannangaaq aallarteriaannaasutut Naalakkersuisunit isigineqarpat?*
- c) Mittarfinnut ataasiakkaanut aningaasalersuutit utertillugit akilernerqarnissaannut ilaasunik angallassinermut tapiissutit isertitsissutaasinnaanerat qanoq sunniuteqarpat?*
- d) Attaveqarnermut, soorlu mittarfinnut atatillugu aningaasalersuutit eqqarsaatigalugit tapiiffiqatigiittarneq qanoq sunniuteqarpa?*

Akissut:

Ineqarnermut, Sanaartornermut Attaveqarnermullu Naalakkersuisoqarfiup akissutaanut innersuussisoqarpoq.

Apeqqut:

3.17. Immikkoortoq 6, Naalakkersuisut salliutitaat, qupp. 102

Umiaarsuarnut takornariartaatinut akitsuutigitinneqartumik appaanissamut atatillugu ilaatigut kontomut pingaarnermut 64.10.17-imut, Nunami inuussutissarsiutinut takornariartitsinermullu tapiissutinut tunngasumut, aningaasaliissutit

eqqumiitsuliornerup misigisassarsiortarnerullu ineriartortinneqarnissaannut 1,6 mio. kr.-inik ikilineqassasut quppernermi 104-mi taaneqarpoq.

- a) Taartitit sipaaruteqartoqalenera eqqarsaatigalugu umiarsuarnut takornariartaatinut akitsuutip appartinneqarnera takornariartitsinermi isertitanut, taamaallillunilu nunatta karsianut pitsaasumik sunniuteqassanngitsutut Naalakkersuisunit isigineqarpa?
- b) Takornariartitsinermik ingerlatsinermik siuarsaanissaq Naalakkersuisunit siunertarineqarpat takornariartitsinermik ineriartortitsinissamut aningaasat immikkoortinneqartut ikilineqarnerat imminnut assortuuttutut ataatsimiititaliamit isigineqarpoq?

Akissut:

Inuussutissarsiornermut, Suliffeqarnermut, Niuernermut Nunanullu Allanut Naalakkersuisoqarfimmiit akissutinut innersuussisoqarpoq.

Apeqqut:

3.18. Immikkoortoq 6, Naalakkersuisut salliutitaat, qupp. 105

Konto pingaarneq 10.13.11-mi, Aktiaateqarluni ingerlatseqatigiiffinnut toqqaannartumik aningaasartuutinut tunngasumi, 2018-imi Nunaoil A/S-mut akileeqqaarutit Naalakkersuisunit 10 mio. kr.-it immikkoortinneqarput, taakkullu suliffeqarfiup "going concern"-iuunnarnissaanut Naalakkersuisut malillugit pisariaqarput.

- a) NunaMinerals A/S pillugu suliaq misillerfigalugu suliaq pineqartoq ataatsimiititaliamit ima paasineqarsinnaavoq ingerlatseqatigiiffiup sillimmatini nungusarlugit aallartikkai. Tamanna pillugu Naalakkersuisut oqaaseqarnissaat ataatsimiititaliamit kissaatigineqarpoq.

Akissut:

Naalakkersuisut Siulittaasuata Naalakkersuisoqarfianit akissutinut innersuussisoqarpoq.

Apeqqut:

3.19. Immikkoortoq 6, Naalakkersuisut salliutitaat, qupp. 103

Tarnimikkut nappaatilinnut immikkoortortamik nutaamik Naalakkersuisut pilersitsilersaarpat?

Akissut:

Peqqissutsimut Nunanilu Avannarlerni Suleqatigiinnernut Naalakkersuisoqarfimmiit akissutinut innersuussisoqarpoq.

Apeqqut:

3.20. Immikkoortoq 6, Naalakkersuisut salliutitaat, qupp. 106

Kontomi pingaarnermi 24.13.50-imi, Akileraartarnermi akitsuusiisarnermilu isertitaqarnerulernissamut sillimmatinut tunngasumi, 2016-imit isertitassatut sillimmasiunneqarput -97,5 mio. kr.

- a) *Tamanna ataatsimiititaliamit ima paasineqassava; Thule Air Basemit isertitassatut annaasat allatut aningaasalersorneqassasut, taamaalillunilu nunatta karsiata aningaasartuutaanik naleqqussaaniisaaq pinngitsoortinneqarluni?*

Akissut:

Uppernarsarneqarsinnaavoq Aningaasaqarnermut Ataatsimiititaliap eqqarsaasersuutai eqqormata. Isertitanut sillimmatit piviusunngortinneqassappata taamaaqataanik annertussuseqartut matussusissaannut aningaasalersuisoqartussaassaaq, tassa imaappoq 97,5 mio. kr.-inik aningaasalersuineq.

Apeqquut:

- b) *Aningaasanut inatsisissatut siunnersuutip saqqummiunneqarnerata kingorna paasissutissanik nutaanik, isertitassat pitsaanngitsumik ikileriaateqarnissaannik naatsorsuutiginninnermut ersarinnerusumik paasissutissiinnaasunik saqqummertoqarpa?*

Akissut:

Naamik. Naalakkersuisut paasissutissaataat ilisimaneqartut kingullit novembarip 27-ani 2014-mi ilisimatitsissutitut isertuussassatut Aningaasaqarnermut Ataatsimiititaliamut nassiunneqarput. Taamanili paasissutissanik allanik Naalakkersuisut suli tigusaqarsimangillat.

Apeqquut:

3.22. *Immikkoortoq 6, Naalakkersuisut salliutitaat, qupp. 109*

Ilinniartunut ineqarfiliornissamut aningaasalersuutissanik suli nassaartoqanngitsoq, taamaattumillu pisariaqartitsineq matussuserniarlugu namminersortunit attartortoqartariaqartoq Naalakkersuisut paasissutissiissutigaat.

- a) *Sooruna ilinniartut ineqarfii suli amigaatigineqartut – ilinniartitaanikkut suliniut maanna ukiuni amerlasuuni ingerlanneqareerpoq aammalu ilinniagaqartut amerlisarniarlugit suliniutit naalakkersuinikkut ataavartumik isumaqatigineqarlutillu tapersorsorneqarput. Ilimmarfiup sananeqarnissaa pillugu taamani Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik tunngavilersuimmat allaat erseqqissaatigineqarpoq illutaannaata ilinniartunik tiguisarneq ukiumut 50 procentimik annertusisissagaa. Ilinniagaqartunut taama amerlatigisunut ilinnialertussatut naatsorsuutigineqartunut paasineqartunullu ilinniartut ineqarfiinik sanaartornissaaq soq pilersaaruserneqarsimangila?*
- b) *Namminersortunit attartornikkut ilinniartut ineqarfiinik pisariaqartitat ilaat qanoq annertutigisut matussuserneqartussatut naatsorsuutigineqarpat?*
- c) *Attartornermut aningaasartuutit qanoq amerlatigissanersut Naalakkersuisunit naatsorsorneqarsimava? Aammalu ilinniartut ineqarfiinik attartorneq*

imaluunniit sanaartorneq imminut akilersinnaanerunersoq pillugu naatsorsukkanik peqarpa?

- d) *Attartornermut aningaasartuutit annikinngitsut akilersorneqarnerat ingerlatiinnarnagu Illuut realkreditimik aningaasalersorneqartumik ilinniartut ineqarfiinik sanatinneqarpat tamanna siunissami imminut akilersinnaanersoq Naalakkersuisut naatsorsorsimavaat. Ukiualunnguit ingerlanerinnaani tamanna imminut akilersinnaavoq.*

Akissut:

Ilinniartitaanermut, Kultureqarnermut, Iisimatusarnermut Ilageeqarnermullu Naalakkersuisoqarfimmit akissutinut innersuussisoqarpoq.

Apeqqut:

3.23. Immikkoortoq 7, Missinginerit nutaat aamma akinik akissarsianillu siumut naatsorsuineq, qupp. 110

Namminersorlutik Oqartussat sulisui qanoq amerlatigisut Kalaallit Nunaanni aammalu nunani allani akileraarusorneqarpat?

Akissut:

Eqqoqqissaartumik naatsorsuisoqarnikuunngilaq, kisiannili Namminersorlutik Oqartussani atorfillit amerlanersaat Kalaallit Nunaanni akileraartartuupput.

Apeqqut:

3.24. Immikkoortoq 10, AIS 2016-imik piareersaaneq, qupp. 112

- a) *Akileraartarnermut tunngasuni iluarsaaqqinneq Naalakkersuisunit qaagu aallartinneqartussat naatsorsuutigineqarpa?*

Akissut:

Unamminartut aaqqiissutissallu suunerisa paasineqarnissaat siunertaralugu sulisitsisunik sulisartunillu, pensioninik toqqorsivinnik il.il. oqaloqateqarnerit aallartinneqarput. Oqaloqatigiinnerup suliassamut tunngavissiamik, isumasioqatigiinnermik assigisaanilluunniit kinguneqarnissaa naatsorsuutigineqarpoq. Maannakkut naatsorsuutigineqarpoq oqaloqatigiinnerit 2016-ip aamma 2017-ip ingerlanerani inatsisissatut siunnersuummik kinguneqarumaartut.

Apeqqut:

- b) *Akileraartarnermit - Atugarissaarnermullu Ataatsimiititaliarsuarmit isumaliutissiissut aammalu isumaliutissiissummi siunnersuutit tunniunneqartut, qanoq apeqqusersorneqassanersut, Naalakkersuisut isummerfigaat?*

Akissut:

Attassinissamut siuariartornermullu pilersaarut Akileraartarnermut atugarissaarnermullu ataatsimiititaliarsuup inassuteqaataanut akissutitut

isigineqarsinnaavoq. Attassinissamut siuariartornermullu pilersaarut iluarsartuusseqqinnikkut suliniutinik, inuiaqatigiinni aaqqissugaanikkut ajornartorsiutinik aaqqiisussanik aamma pisortat ingerlataqarfiinik pisariillisaasussanik imaqarpoq. Aammattaaq missingersuusiornermi inatsisip iluarsartuuteqqinneqarnissaanut Aningaasaqarnermut Naalackersuisoqarfik suliaqarpoq, ilaatigut aningaasartuutit qaffasiffiisa allanngortinnginnissaanik isumaginnittussaq, aningaasaqarnikkut iliuseqarfigisinnaasaq erseqqinnerulersillugu taamaalillunilu siunissami pisortani ingerlataqarfimmi tamarmiusunik politikikkut pingaarnersiuiinissamut kiisalu aningaasaqarnikkut attassinissap qulakkeerneqarnissaanut pisariaqartitsisoqarluni.

Apeqqut:

- c) *Ineqarnermut akiliutinut pisortanut akiligassatigut kinguaattoorutit ikilisarniarlugit ineqarnermut akiliutissat akissarsianit ilanngaatigineqartalernissaat Naalackersuisut ilanngullugit isumaliutigisimavaat?*

Akissut:

Pilersaarut "Pisortanut annikinnerusunik akiitsoqalernissaq – Ilangaassivik" Naalackersuisunit aallartisarneqarpoq, tassani siunertarineqarluni pisortanut akiitsunik akilersuinerup siuarsarnissaanut aamma akiitsut nutaat pitsaaliornissaanut inatsisitigut teknikikkullu periarfissanik paasiniaanissaq. Innuttaasunut suliffeqarfinnullu naleqqiullugu periarfissanik pilersaarut paasiniaasimavoq pilersaarutillu ingerlateqqinneqarnissaanut qanittukku Naalackersuisut isummernissaat naatsorsuutigineqarluni. Aningaasaqarnermut Akileraartarnermullu Ataatsimiititaliaq 2015-imi ukiup affaata siulliup ingerlanerani tamanna pillugu erseqqinnerusumik ilisimatinneqarumaarpoq.

4. Takussutissiat

Apeqqut:

Sanaartugassat illoqarfinnut aqquataakkat, qupp. 140 -

- a) *2014-imi aningaasanut inatsisissatut siunnersuutip suliarineqarnerani ataatsimiititaliap kissaatini utaaqqissavaa, tassalu kommunit sanaartugassatut kissaataat pillugit takussutissiaq kingullertut suliarineqartoq nassiunneqassasoq. Naalackersuisut kissaatigineqartunut akuersaarsimanersut takussutissiami nalunaarsorneqassasoq kissaatigineqarpoq.*

Akissut:

Aggustimi Naalackersuisut siusinnerusukkut saqqummiussimasaanut naleqqiullugu AIS2015-imi sanaartornermi aningaasanik pingaarnersiuiinneq annikitsuinnarmik

ajornarsimangilaq. Tamatumunga pissutaavoq 2015-imi piffissamut sanaartorfiusumut aamma pilersaarutitut aallartinneqareersimasunut naleqqiullugu allannguinissamut piffissatigut ajornarsimavoq. Taamaattumik december 2014-mi Naalackersuisut inissititernerisa kingorna kommuninit sanaartornissamut kissaatinik pissarsiniartoqarsimangilaq. ilanngussaq XX takujuk for Marts 2014-mi tiguneqartut kissaatit pillugit takussutissiaq.

Apeqqut:

b) Sanaartugassatut kissaatit taakku ilaminiinnanguit Namminersorlutik Oqartussat aningaasalersueqataa nerisigut kisimik piviusunngortinneqartarpata sanaartugassatut ukiumoortumik kissaatit suliarineqartarneranni kommunini nukissat annertuallaat maangaannartinneqartartut Aningaasaqarnermut Ataatsimiititaliaq isumaqarpoq. Suliassat nammatassallu agguataarneqarnerat pillugu isumaqatigiissut nutaaq taamatut anguniagaqarnermut siuarsaataasutut isigineqarnersoq paasissutissiissutigineqassasoq kissaatigineqarpoq.

Akissut:

Ataqatigiissarneqanngitsumik pilersaarusiortarnerup sanaartornermi pilersaarutitik kinguarsaasarnernik akisunerulersitsisarnenanullu ullumikkut assersuutissarpassuaqarpoq.

Missingersuutitigut suleqatigiittoqarnissaanut isumaqatigiissummi isumaqatigiissutigineqarpoq siunissamut ungasinnerusumik pilersaarusiortoqarnissaa sulissutigineqassasoq, pingaartumik sanaartornermi.

Ingerlataqarfii akornanni ataqatigiissaarineq nukittorsarniarlugu sanaartornermi pilersaarusiorneq pillugu kommuninik ingerlaavartumik Naalackersuisut oqaloqateqartarput.

Taamaattumik pingaarpoq kommunit pisariaqartitaat toqqaannartumik Naalackersuisunut anngunneqartarnissaat. Mannali tikillugu nalunaarusiat allatat takutippaat pingaarnersiuiernermi tamarmiusumi ilanngussinissamut immersuinissamullu kommuninut ajornakusoorsimasoq.

AIS2016-imut sanaartugassatigut kissaatinik pissarsiniarnermut atatillugu kommunit nalunaarusiornissaannut sukumiinnginnerusumik piumasaqaateqartumik nassiussisoqarsimavoq, kommunini allaffissornikkut artukkiineq annikillisinniarlugu. Peqatigisaanik qaninnerusumik oqaloqatigiinnissamut suliniuteqartoqarpoq. Ulloq 17. 18. marts 2015-imi kommuninit tamanit aamma namminersorlutik oqartussani naalackersuisoqarfinit peqataaffigineqartumik pisortat isumasioqatigiissinneqarput. Tassangaanniit inassuteqaatit piaartumik politikikkut ataqatigiissaarisuni suliarineqassapput aamma AIS2016 pillugu aningaasanut inatsisip suliarineranut ilaasussaallutik. Tamatuma kingorna Aningaasaqarnermut Akileraartarnermullu Ataatsimiititaliaq tamanna pillugu ilisimatinneqassaaq.

Apeqqut:

- c) *Pisortat sanaartornermut suliassa qarfiata (annertunerpaartaata) kommunitun tunniunneqarnissaa anguniagaasutut suli isigineqarpa?*

Akissut:

Naalakkersuisut pingaarnertut anguniagaat tassaavoq sanaartornermi aningaasartuutunik avissilluni aningaasalersuisoqarfiusut pinngitsoortinnissaat annerusumillu sanaartorneq pillugu aalajangiinermi aningaasartuuteqarneq tamarmiusoq eqqarsaatigineqartariaqarluni. Tassani pisariaqarpoq siunissamut ungasinnerusumut eqqarsarnissaq aamma sanaartornermi missingersuutit aamma ingerlatsinermi aserfallatsaaliinermilu aningaasartuutit ingerlaavartut akornanni toqqaannartumik atassummik pilersitsisoqarluni. .

Immikkoortuni arlalinni maannakkut naliliineq tassaavoq immikkoortuni arlalinni sanaartornermut akisussaaffik kommuniniittariaqartoq. Tassanili pisariaqarluni kommunit suliap taassuma kivinnissaanut piginnaasaqarnissaat, tassunga ilanngullugit sulisinnaasunik piukkunnaateqartunik sulisussarsinissamut aamma immikkoortut aningaasaqarnikkut isumaginissaannut periarfissaqarneq. Ullumikkut suliap taassuma isumaginissaanut kommunit assigiinngitsorujussuarmik piareersimapput taamaattumillu Namminersorlutik Oqartussanut naleqqiullutik sunnertianerullutik. Suliap nuunneqarnissaanut tunngavik aamma tassaavoq immikkoortumi qanoq ittoqarneranik aamma nutaanik sanaartornissamut pisariaqartitsinernik kinguaattoorutillu qaangerneqarnissaannut paasisimasagarluarnissaq. Tamanna tunniussinissap piareersarneranut ilaatigullugu isumagineqassaaq.

Apeqqut:

- d) *Nuup sinerissallu akornanni sanaartorneq pisortanit aningaasalersorneqartoq oqimaaqatigiissaagaanngitsoq innuttaasut oqallinneranni tusarneqarajuppoq. Taamatut isiginninnerit Nunatta Karsiata sanaartornermut aningaasaataasa pingaarnersiorlugit tulleriiaarneqarnerannut peqataassatillugit taakku ataatsimiititaliamut ilisimatitsissutigineqarsimasunit pitsaannerusumik nassuiaateqartinneqartariaqartut Aningaasaqarnermut Ataatsimiititaliaq, isumaqarpoq. Taamaattumik pisortat sanaartornermut aningaasaataannut tamarmiusunut, tassunga ilanngullugu Mittarfeqarfinnut Nukissiorfinnullu takussutissiaq titartagartalik taakkulu ukiuni tamani Nuummumut sinerissamullu agguataarnerannut (missingerneqarsinnaasumik) takussutissiaq kissaatigineqarpoq. Ukiunut 2000-2014 takussutissiaassasoq kissaatigineqarpoq.*

Akissut:

Ataatsimiititaliamit ujartorneqartut paasissutissat tulluartaupput maannakkullu taakku pissarsiarinissaannut pitsaassusaasalu qulakkeerneqarnissaannut sulineq ingerlanneqarluni. Tamannalu suliavoq annertuumik isumalluutunik pisariaqartitsisoq.

Aningaasaqarnermut Naalackersuisoqarfik peqataasut attuumassuteqartut
peqatigalugit sanaartornermi pilersaaruserit ataqtigiissarnissaannut
akisussaasutut ilaatigut 2016-imut aningaasanut inatsisissap piareersarnerata ilaatut
paasisimasaqarnissap ujjartorneqartup pilersinneqarnissaanut aamma soqutiginnippoq.
Suliaq annertoq taanna sulii ingerlanneqarmat ataatsimiititaliamit ujjartorneqartut
paasisutissat kingusinnerusukkat pigineqalerpata nassiinneqarumaarput.

**6. Suliassaqarfik 20 - 24 kiisalu 66-67 Aningaasaqarnermut
Aatsitassanullu Naalackersuisoq**

Apeqqut:

6.1 Konto pingaarneq 20.05.31 Kommunini aningaasartuutaanerususanut
immikkoortitat

*Kommunini aningaasaqarneq aqunneqaleqqullugu nukinnik atuisariaqarfimmi sooq
maanna sipaaruteqartoqarpa?*

Akissut:

2014-mi 1,5 mio. kr.-iniit 2015-imi 1,0 mio. kr.-inut aningaasaliissutit ikilisinneqarneri sipaaruteqarnermut takussutaanngillat. Aaqqissuussaanermik iluarsaaqqinnerup nalilersornissaanut atorneqartussanik maannakkut kontomi pingaarnermi aningaasanik immikkut 2014-mi immikkoortitsisoqarpoq, IA-suliami nr. 14-667 naap.

Apeqqut:

6.2 Konto pingaarneq 20.05.44 EU-mik suleqatigiinnissamut isumaqatigiisummit
isertitat

*20 %-it pissarsiariniarlugit Namminersorlutik Oqartussat nukinnik qanoq
annertutigisunik atuippat?*

Akissut:

Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfimmiit akissummut innersuussisoqarpoq.

Apeqqut:

6.3 Konto pingaarneq 20.10.11 Ilanngaaseereerluni erniat

Mittarfeqarfiit, Nukissiorfiit aammalu KNR Nunatta Karsianit tiguisinnaatissallugit Naalackersuisut oqaasertaliussakkut piginnaatinneqarput. Oqaasertaliussamut nassuiaatit ataanni paasissutissiissutigineqarpoq (suliffeqarfiit) uninngasuutaat 1 % procentimik ukiumut naatsorsorlugu ernialersorneqartut, tamannalu Namminersorlutik Oqartussat aningaasanik pineqartunik aningaaserivimmumt inissiinerannut sanilliullugu angusarisaannit appasinnerulaartog.

- a) *Suliffeqarfinnut taaneqartunut tiguisinnaatitaanerup tamatuma atuutsinneranut Nunatta Karsiata ilanngaaseereerluni aningaasartuutai qanoq annertutigippat?*

Akissut:

Niuernerpalaartumik niuerfinni erniat suut ingerlatseqatigiiffinit anguneqarsinnaanersut assigiinngitsorujussuussapput, taamaattumik imaaliiallaannartumik apeqqummut paatsuugassaannngitsumik akissuteqarnissaq ajornarluni. AIS 2016 tungaanut nunatta karsiani tigusisinnatitaanissamut piginnaatitaaneri atorneqarnissaannut naleqqiullugu erniat pillugit politikkini Naalakkersuisut eqqarsaatigissavaa, ilaatigut siunertamut tassunga nunatta karsia qanoq aningaasartuuteqarnissaa eqqarsaatigalugu.

Apeqqut:

b) *Tigusisinnatitaaneq 6 %-imik naatsorsorlugu ernialersorneqartoq uninngasuutillu 1 %-imi naatsorsorlugu ernialersorneqartut Naalakkersuisut paasisutissiipput. Erniat annertussusii taakku ernianut niuernerpalaartumik atugassarititat allat malillugit aalajangersarneqarsimappat?*

Akissut:

Nunatta karsiata akiliisinnassuseqarneranik sinneruttunik aqutsineq pillugu ingerlatsivimmik isumaqatigiissusiortoqarsimavoq. Tassunga aningaasartuutitut niuerfinnut allanut naleqqiullugu taakku qanoq ingerlanersut apeqqutaapput. 2014-mi ingerlatseqatigiiffik 605 t.kr.-inik akilerneqarpoq.

Apeqqutip 6,3a-mut akissummut aamma innersuussisoqarpoq, tassa tigusisinnatitaanermi 6 %-it maannakkut taamatut ingerlatani niuernerpalaartumik erniatigut atugaasutut taaneqarnissaannut naammangimmata.

Apeqqut:

c) *Nunatta Karsiata akiitsuinik aqutsinerup aningaasallu tigoriaannaat inissinneqarnerisa kingunerisaannik aningaasaliissutitut qanoq amerlatigisut Nunatta Karsiata ilanngaaseereerluni aningaasartuutigai?*

Apeqqut:

d) *Kotomut pingaarnermut matumunnga suliassamut kisitsisinik ilanngussinissaq ajornangila?*

Akissut:

Apeqqut c aamma apeqqut d ataatsimoortillugit akineqarput. Ingerlatseqatigiiffimmi, uninngasuutitat qanoq ittuunerini kiisalu taarsigassarsiani aningaasartuutit isertitallu annertunerusumik immikkoortiterinissaq ajornassanngilaq. Tamanna AIS2015-imut allannguutissatut siunnersuummi ilanngunniarneqassaaq.

Apeqqut:

6.4 Konto pingaarneq 20.10.13 KNR-ip tigusisinnatitaanermut piginnaatinneqarneranik isumakkeerinnineq

- a) KNR-ip aningaasaqarnikkut attanneqarsinnaasumik ingerlanneqarnissaa qulakkeerniarlugu iliusissatut pilersaarutip piviusunngortinniarnera sumut killippa?
- b) KNR-ip 2007-imi atortunut pisiaanut taartissatut atortunik digitaliusunik nutaanik KNR-ip qaqugu aningaasartuuteqarsinnaalernissaa Naalakkersuisunit naatsorsuutigineqarpa? Tamatumunnga aningaasartuutissat qanoq annertutigissappat?
- c) Kontomut pingaarnermut matumunnga suliassamut kisitsisinik ilanngussinissaq ajornangila?

Akissut:

Ilinniartitaanermut, Kultureqarnermut Ilisimatusarnermut Ilageeqarnermullu Naalakkersuisoqarfimmit akissutinut innersuussisoqarpoq

Apeqqut:

6.5 Konto pingaarneq 20.10.22 Isertitat allat

- a) Ukiumi aningaasanut inatsiseqarfiusumi matumani inissiat maannamut qanoq amerlatigisut tunineqarpat qanorlu amerlatigisut tunineqassangatinneqarpat aammalu tunisineq qanoq annertutigisumik isertitsissutaava kiisalu ukiumi aningaasanut inatsiseqarfiusumi matumani qanoq annertutigisumik isertitsiviusussatut naatsorsuutigineqarpa?
- b) Inissianut tunineqartunut taakkulu tunineqarneranni akiusunut takussutissiaq kissaatigineqarpoq.
- c) Kontomut pingaarnermut matumunnga suliassamut kisitsisinik ilanngussinissaq ajornangila?

Akissut:

Ineqarnermut, Sanaartornermut Attaveqarnermullu Naalakkersuisoqarfimmit akissutinut innersuussisoqarpoq.

Apeqqut:

6.6 Konto pingaarneq 20.11.50 Ingerlatsinerneq sillimmatit

Røde Korsip saniatigut allat kontomit pingaarnermut matumunnga aningaasanik pissarsinissamut periarfissaqarpat?

Akissut:

Aap.

Oqaasertaliussani Røde Korsip saniatigut allat kontomit pingaarnermut matumunnga aningaasanik pissarsiaqartoqartoq allanneqarpoq.

Apeqqut:

6.7 Konto pingaarneq 20.11.51 Nutarterinerit sunniutaat

- a) Naalackersuisut naatsorsuutigaat nalilersuinerup nassataanik siusinaartumik pensionisisartut 15 %-ii nalinginnaasumik suliffeqalissasut, piginnaangorsaaqqissasut imaluunniit oqitsunik suliffeqalissasut. Maleruaqqusat nutaat UPA15-imi saqqummiunneqartussat malillugit qanoq akulikitsigisumik taamatut nalileeqqittoqartassava?
- b) Sipaartussatut taakkartorneqartut anguniarlugit tunngavissat Naalackersuisut kommunit peqatigalugit aalajangiivigaat?
- c) Kontop pingaarnerup 30.12.09-p, Siusinaartumik pensionisianut tunngasup ataani suliassami kisitsisit naapertorlugit 15 %-it taakku inunnut 450-inut naapertuupput. Inuit taakku nalinginnaasumik suliffeqalernissamut periarfissaannut missingikkamik Naalackersuisut saqqummiussisinnaappat?
- d) Siusinaartumik pensionisialik assersuutigalugu sinerissamut qanittumi umiatsiaararsorluni aalisarnermik saniatigut inuussutissarsiuteqarnissaminut periarfissaqartoq aammalu aalisarnerminnit annertoorujussuarmik isertitaqartarnermik saniatigut siusinaartumik pensionisianik pisartagaqartunik umiatsiaararsorluni ullumikkut aalisartoqartoq ataatsimiititaliamit ilisimaneqarpoq. Inuit taamatut isertitaqartut sapinngisamik imminnut pilersortuunissaat pissusissamisoortoq ataatsimiititaliaq isumaqarpoq. Inuit ilaat peqqiillionertik pissutigalugu immaqa piffissap ilaannaani imminnut pilersorsinnaasut, taamaattumillu piffissap ilaannaani sulisinnaassuseqanngitsut aaqqissuussinermi nutaami eqqumaffiginiarneqassappat?
- e) Assersuutigalugu ineqarnermut tapiissutitut ittunik tunniussinissamut maanna isertitat siunissami aallaavigineqartalernissaat Naalackersuisut kissaatigaat. Tamanna piniarnermik aalisarnermillu inuussuteqartunut – sunniuteqassappat - qanoq sunniuteqassava?
- f) Imm. 4-p ataani oqaatigineqartut naapertorlugit aalisarnermi isumalluutininik akileraarusersuineq eqqarsaatigalugu Naalackersuisut anguniagaanni annikinnerusumik ersernerluttoqarsorinarpoq. Allassimasut Naalackersuisunit iluoornerarneqarsinnaanersut, tassungalu ilanngullugu isertitassatut missingikkat taaneqartut taamaaginnarnersut paasissutissiissutigineqassasooq ataatsimiititaliamit kissaatigineqarpoq.
- g) Aalisarnermi isumalluutininik akileraarusersuinerup annertusineqarnera inuussutissarsiortut unammillersinnaassusiannut sunniuteqartussatut Naalackersuisunit naatsorsuutigineqarpa?
- h) Pensionisiat tunniunneqarneranni ilanngaati allanngornerannut tunngatillugu tamanna pillugu ataatsimiititaliap nalinginnaasumik nassuiaatini oqaatigisai innersuussutigineqarput.

Akissut:

Ilaqutariinnermut, Naligiissitaanermut Isumaginninnermullu Naalackersuisoqarfimmiit akissutininut innersuussisoqarpoq.

Apeqqut:

6.8 Konto pinqaarneq 20.11.61 Ilinniartitaanermut sillimmatit

Qupperneq 212-imi takussutissiaq ilanngunneqarsimasup nassuiaataa ataatsimiititaliamit amigaatigineqarpoq aamma taamaappoq takussutissiap taassuma assinga AI 2014-imiittoq eqqarsaatigalugu.

Akissut:

Ilinniartitaanermut, Kultureqarnermut Ilisimatusarnermut Ilageeqarnermullu Naalakkersuisoqarfimmit akissutinut innersuussisoqarpoq.

Apeqqut:

6.9 Konto pinqaarneq 20.11.70 Suliniutinut nutaanut sillimmatit

- a) *Inatsisartut ataatsimiittarfissaata nutaap aalajangiiffigineqarnissaa qaqugu pisussatut Naalakkersuisunit naatsorsuutigineqarpa?*

Akissut:

Suliaq pillugu Naalakkersuisut Inatsisartut Siulittaasoqarfiannik ingerlaavartumik oqaloqateqarput, tassa suliami tassani Inatsisartunut naleqqiullugu Siulittaasoqarfik inassuteqartuunera naatsorsuutigineqarmat.

Apeqqut:

6.10 Konto pinqaarneq 20.16.01 Naatsorsueqqissaartarfik

- a) *Nuna tamakkerlugu kisitsisitigut paasissutissanik pisariaqartutut kissaatiginartutullu isigineqartariaqartunik Naatsorsueqqissaartarfiup suliaminik isumaginnissinnaanissaanut aningaasaliissutit naammappat, tamatumani aamma eqqarsaatigineqarluni kommunit ingerlataannut atatillugu assigiissaartumik nalunaarsuisoqartarnissaanik kissaateqartoqarnera?*

Akissut:

Nunami mikinerni soorlu Kalaallit Nunaanni amerlanertigut kisitsisitigut paasissutissaliorneq akisuujusarpoq Naak kisitsisitigut paasissutissat aallaaviatigut inukinnerusuni suliarineqaraluartut kisitsisitigut paasissutissanut aningaasartuutit inuit amerlassusaannut naleqqiullugit annikillisinneqarsinnaanngillat. Naatsorsueqqissaartarfiup siulersuisui kisitsisitigut paasissutissanik pingaarnersiuissatillutik taamaattumik kisitsisitigut paasissutissaqarfiit suut suliarineqarnissaannik pingaarnersiuissariaqartarput.

Naatsorsueqqissaartarfik naliliivoq allaffissornermut siunertanut atorneqartussat nalunaarsukkat tunuliaqutaralugit kisitsisitigut paasissutissat eqqornerpaamik kisitsisitigut paasissutissanik pissarsiffiusartut, tassa nalunaarsuiffinni paasissutissat

ingerlaavartumik oqartussanit akisussaasunut nakkutigineqartarmata amerlasuutigullu aamma inunnit imaluunniit suliffeqarfinnit nalunaaruteqartunit aamma. Peqatigisaanik allaffissornikkut nalunaarsukkat tunuliaqutaralugit kisitsisitigut paasissutissaliorneq akikinnerujussuuvoq, tassa Naatsorsueqqissaartarfik nalunaarsukkanik katersinissamut nukinnik atuissanngimmat, aamma paasissutissat assigiaartumik iluseqartillugit nalunaarutigineqartarnissaat qulakkeerneqassalluni. Kiisalu allaffissornikkut nalunaarsukkanik inerisaaneq aaqqissugaasumillu atuineq aamma allaffissornikkut oqartussani akisussaasuni pisariillisaanermut iluaqutaasarluni.

Assersuutigalugu kommunini nalunaarsukkanik nutaanik inerisaasoqassatillugu Naatsorsueqqissaartarfik paasiniaaffigineqassaaq nalunaarsukkat kingornatigut kisitsisitigut paasissutissatut atorneqarsinnaanersut qulakkeerniarlugit. Nalunaarsukkat inerisarneqarpata kukkusumik nalunaarsuisoqartarnersut qulaajarniarlugu Naatsorsueqqissaartarfik aamma peqataassaaq.

Naatsorsueqqissaartarfik 2015-imi ukiup affaata siulliup ingerlanerani ukiunut arlalinnut suliffeqarfimmut pilersaarusiussaaq, taannalu pigineqalerpat ilisimatitsissutitut Aningaasaqarnermut Akileraartarnermullu Ataatsimiititaliamut nassiunneqarumaarluni.

Apeqqut:

b) *Innuttaasut oqallinneranni inuiaqatigiinni aningaasaqarnikkut naligiittoqarunnaariartornera eqqaaneqarajuppoq. Kisitsisitigut paasissutisseeriaatsinik, soorlu Gini-koefficientenimik, Risk of Poverty-ratemik (allanut naleqqiullugu piitsuussuseq) aammalu 80/20-ratioenimik taagorneqartunik taamatut nalililineq piffissap ingerlanerani tapertaqartinneqarpa?*

Akissut:

Naatsorsueqqissaartarfiup anguniakkat qulaani taaneqartut tamaasa naatsorsortarpai. Agguaassinnermi anguniakkat taaku pingasut tamarmik immikkut isertitat agguarneqarnerinik allaaserinnippat. Gini-koefficienti tassaavoq isertitat tamarmik agguarneqarnerinut anguniagaq, piitsuunermullu eqqaanartumut (at-risk-of-poverty rate) anguniakkami isertitat appasinnerpaat isiginiarlugit, aamma ratio-80/20-mi isertitat qaffasinnerpaat appasinnerpaallu akornanni pissutsit allaaseralugit. Anguniakkanut taakkununga piffissat atorneqartut assersuutigalugu kisitsisitigut paasissutissaasivimmi aamma Naatsorsueqqissaartarfiup isertitat pillugit saqqummersitaani nassaarineqarsinnaapput.

Gini-koefficienti aallaavigineqarpat ukiuni kingullerni assigiinngissuseq annikitsumik qaffakkiartortoq takuneqarsinnaavoq.

Apeqqut:

6.11 Konto pingaarneq 20.30.01 Aningaasaqarnermut Sulisoqarnermullu
Aqutsisoqarfik, ASA, allaffissorneq

- a) *Sulisorisassatut naatsorsuutigisat pisortanik marlunnik allanillu 12-inik amerleriaateqarnerat taarsigassarsisitsisarnermik ingerlatsiviup ASA-mut nuunneqarneranik tamakkiisumik nassuiaatissaqartinneqarsinnaava?*

Akissut:

Pisortanik marlunnik amerleriaateqarnermut ilaatigut pissutaavoq Pisiortornermut Utaqqiisaasumillu Illusimatitsinermit Allaffimmik ilaatigullu Naatsorsuutitik ineriartortitsinermit allaffimmik pilersitsinerit. Tamanna sunniuteqarnerusumik annertunerusumik digitalinngortitsinissamik kissaateqarnermut atatillugu immikkoortut ataatsimoortilernerisigut nukittorsarnerisigullu pivoq. Sulisutigut atuinerup annertusineranut pissutaavoq Qitiusumik allaffissuarmit inniartut amerlineqarnissaannik kissaateqarneq. Taakku Aningaasaqarnermut Sulisoqarnermullu Aqutsisoqarfimmi atorfinitsinneqarput, kisianni QA tamarmik sulillutik.

Apeqqut:

- b) *Ilaatigut ASA-miippoq nutserisoqarfik. Ataatsimiititaliali ilisimavaa naalakkersuisoqarfiit arlallit nutserisunik allanik, tassunga ilanngullugit ilaatigut nutserisunik avataaneersunik tamakkiisumik ilaannakortumilluunniit atuisartut. Nutserisoqarfimmi sulisut amerlineqarpata akissarsiallu annertusineqarpata, tamatumalu peqatigisaanik nutserisunik avataaneersunik atuineq inerteqqutinngortinneqarpat naapertuutissanersoq ataatsimiititaliamit siusinnerusukkut isumaliutigineqarsimavoq. Taamaaliornikkut aningaasanik sipaaruteqartoqarsinnaallunilu pitsaassutimik qaffaasoqarsinnaassaaq. Siunnersuut tamanna Naalakkersuisunit qanoq isumaqarfigineqarpa?*

Akissut:

Piginnaasat pitsaassutsillu nukittorsarnissaat siunertaralugu Nutserisoqarfimmi sulisut amerlineqarnissaa naleqqussinnaavoq – aamma sipaarfiulluni. Tamannali suliassanut sulisinnaasunik piukkunnaateqartunik sulisussarsinissamut periarfissanut naapertuuttumik ingerlanneqartariaqarpoq. Aamma Nutserisoqarfiup digitalikkut sakkunik pitsaanerusunik tapersorsorneqarneratigut siunnerfeqartumik sulisoqarpoq, nutserilluni sulinermi naammassisaqarsinnaassutsimut pitsaassutsimullu iluaqutaasumik.

Apeqqut:

- c) *Namminersorlutik Oqartussani nakkutilliinermik ingerlatsinerup nukittorsarneqartariaqarneranik kukkunerisuisut kaammattuutaat aningaasaliissutit eqqarsaatigalugit Naalakkersuisunit qanoq isummerfigineqarsimava?*

Akissut:

Kukkunersuisutigut ingerlataqarneq manna tikillugu atugassarititaasut iluanni nukittorsarneqarpoq.

Apeqqut:

6.12 Konto pingaarneq 20.30.07 Boligstøtte, ernianut akilersuutinullu tapiissutit, ilannaqaaseereerluni

Ineqarnermut tunngasuni pisortat suliassaasa isumagineqarnissaat eqqarsaatigalugu Namminersorlutik Oqartussanik suleqateqarnermi INI-p siunissami inissisimanissaa pillugu Naalackersuisut qanoq anguniagaqarpat?

Akissut:

Boligstøtteimut tunngasut pillugit INI-p aamma ASA-p akornanni isumaqatigiissusiortoqarpoq, 2015-imut tunngasumik.

Apeqqut:

6.13 Konto pingaarneq 20.30.09 Sulisunik utaqqiisaasumik najugaqartitsisarneq

a) Nuummi sulisunik utaqqiisaasumik ineqartitsisarnermut aningaasartuutit appartinneqarnissaat aningaasaliinermi anguniarneqarpoq. Aningaasaliissutit immikkoortinneqartut maanna ukiunilu missingersuusiorfiusuni aalajangersimasuusut ataatsimiititaliamit maluginiarneqarpoq. Tassunga oqaasertaliusaaq nr. 2-mi piffissami killeqartumi najugaqartitsisarnermi allatuulluunniit utaqqiisaasumik najugaqartitsinernut aningaasartuutit matussuserneqarnissaannut atuisut ilaannakortumik akiliuteqartinneqarnissaannut Naalackersuisut piginnaatinneqarput. Piginnaatitsissummik taassuminnga aqutsinermi piffissami killeqartumi najugaqartitsinermi atuisut ilaannakortumik akiliuteqartinnissaannut suliniutit suut Naalackersuisut aallartissimavaat?

Akissut:

Utaqqiisaasumik najugaqartitsinermut allamut ilaatigut atuisut akileeqquneqartarput. Utaqqiisaasumik ineqartitsineq maleruagassat atuuttut malillugit akileraaruserneqartarpoq.

Apeqqut:

b) Piffissami killeqartumi inissianik akileraarusersuineq maannamut qanoq misilittagaqarfigineqarpa?

Akissut:

Utaqqiisaasumik inissianik akileraarusersuinemik ingerlanneqartumik Naalackersuisut misissueqqissaarsimanngillat, tassa utaqqiisaasumik inissiat tamakkiisumik

ilaannakuusumilluunniit akeqanngitsumik sulisitsisumiit atugassanngortinneqartut inissiat allat assigalugit akileraarusersorneqarmata.

Misisillitakkat takutippaat utaqqiisaasumik inissianik akileraarusersuinerup kingullermik atulersinneqarnera ajornartorsiutitaqanngitsumik atulersinneqarsimasoq

Apeqqut:

6.14 Kontot pingaarnerit 20.30.10 Namminersorlutik Oqartussat qitiusumik allaffeqarfii aamma 20.30.11 Namminersorlutik Oqartussat illuutaannik aserfallatsaaliuineq

- a) Nuuk Centerimi napasuliaq atorneqalerneranut atatillugu sipaarutit suut anguneqarpat?

Akissut:

Napasuliaq 2012-mi atorneqalerpoq. Tassunga atatillugu inissiat Nuuk Centerip avataaniittut attartukkanik marlunnik ikilisinneqarput. Tamatuma kingunerisaanik aningaasaliissutit 4 mio. kr.-it missaannik ikilisinneqarput.

Apeqqut:

- b) Illuni A, B, F, G, H, L, M aamma N-mi (Nuummi qitiusumik allaffeqarfitoqqami Namminersorlutik Oqartussat atugaani) tamani aserfallatsaaliinikkut iluarsaanikkullu kinguaattoorutit kr.-inngorlugit missingerneqarnerat qanoq annertutigaa?

Akissut:

2013-mi aserfallatsaaliinermi kinguaattoormik nalilersuinermit sinneruppoq kiassaateqarfiup, illunut tamanut tunngasup pitsanngorsarnissaa. 2015-imi aningaasartuutissat naatsorsuutigineqartoq 3 mio. kr.-it missaaniippoq.

Apeqqut:

6.15 Konto pingaarneq 20.40.02 Nuna tamakkerluq digitalinnqortitsinissamut periusissap atuutisilnera

- a) Pisariaqartinneqartunik Namminersorlutik Oqartussat pissarsisinneqarlutillu akiliisarnissaat qanoq ililluni qulakkeerneqarsimanersoq pillugu Naalackersuisut naliliinissaat ataatsimiititaliamit kissaatigineqarpoq?

Akissut:

Ineriartortitsinermi suliaqarnermut atatillugu pisortat ataatsimoorullugu pilersaarusiordiaasiat, kommunit, KANUKOKA aamma Namminersorlutik Oqartussat suleqatigiillutik 2014-mi ineriartortissimasat atorneqassaaq Malitassamiippoq aqutseriaaseq, pilersaarutip ingerlarna pillugu nalunaarusiortarnerit aalajangiisarnerillu aaqqissugaaneriniq qulakkeerisoq. Soorlu aamma pisortani ingerlatsivinnit tamanit

FOIS-imi (Pisortat ataatsimoorlutik qarasaasiat pillugit aqutsisoqatigiivini) ataatsimoortumik aqutsisoqatigiittoqartoq pilersaarutitik tamarmiusunut aqutsisut.

Digitalinngortitsinermit periusissiamiit aningaasanik qinnuteqarnermi (ukiumut 10 mio. kr.-it) piunasaqaatit arlallit tunuliaqutaralugit ilaatigut pilersaarutip tamarmiusup nassuiarneqarneranik pitsaassutsikkut isornartumik qulakkeerisoqartarpoq, suliassanik aqutsisunut inassuteqartoqarnissaa sioqqullugu aamma pingaarnerisuiineq pitinnagu, taakkunannga pingaarnerisaalluni peqqinnartumik pilersaarutip tamarmiusup nassuiaaneq, immikkuualuttunik uuttorneqarsinnaasunillu sunniutinik anguniakkanik imaqartoq. Allanguinermik aqutsineq iluanaarutillu piviusunngortinneri aamma pilersaarutip suulluunniit ingerlaneranut aalajangersimasumik ilaapput.

Apeqqut:

- b) Tamatuma saniatigut pilersaarutit killiffiat siuariartornerallu pillugit nassuiaat ataatsimiititaliamit kissaatigineqarpoq.*

Akissut:

Digitalinngortitsinermit periusissiami 2014-mi suliat pillugit ukiumoortumik nalunaarusiaq suli nutsertinneqarpoq, naatsorsuutigineqarlunili kingusinnerpaamik 2015-imi apriliip naalernerani naqinneqassasoq. Nalunaarusiaq pigineqalerpat ataatsimiititaliaq ilisimatinneqarumaarpoq.

Nalunaarusiami periusissiaq tassanilu suliniutit pillugit immikkuualuttut ilanngullugit nassuiaasoqarpoq, ataaniittumili 31.12.2014-mi killiffik takuneqarsinnaalluni:

Periusissiami suliat killiffii pillugit takussutissiaq			
Pilersaarutip killiffia:		Pilersaarutit erseqqissarneqartut:	Pissarsiat:
Isumassarsiaq	0		
Misissueqqissaarneq	11	Allagarsiat digitaliusut	Pisariillisaaneq sipaarutillu
Pisineq	3	Pilersaarut ERP	Aningaasaqarnikkut aqutsineq, pisariillisaaneq sipaarutillu
Naammassinera	8	Elektronikkimik Napparsimasunik Nalunaarsuiffik	Pisariillisaaneq pitsaanerusumillu suliarinnineq
Piviusunngortitsineq/naammassineqartut	4	Video atorlugu attaveqarneq	Angalanermi aningaasartuutini, inatsisartut ataatsimiittarfiani isumannaatsumik oqaloqatigiinnerni aamma annertunerusumik oqartussaaqataanikkut sunniuteqarneq suli aallartinneqanngillat
Suli aallartinneqanngitsut	12	Annerusumik digitalikkut piginnaasanut tunngasut aamma ilinniartitaanerit aallartinneqarnissaat suli amigaataapput	
Pilersaarutit katillugit	38		

Apeqqut:

6.16 Konto pingaarneq 24.01.01 Akileraartarnermut Aqutsisoqarfik, allaffissorneq

2014-imi aningaasanut inatsisissatut siunnersuutip oqaluuserineqarnerani aatsitassarsiornermut tunngasut kisiisa pinnagit nunani tamalaani suliffeqarfiit ataatsimut isigalugu nakkutilliivigineqarnerat naligiissarneqarnerallu nukittorsarneqaaqqittariaqartoq Naalakkersuisut paasissutissiipput. Suliaq tamanna Naalakkersuisunit ingerlateqqinneqarsimava?

Akissut:

Kalaallit Nunaanni nunani tamalaani ingerlataqartunut naleqqiullugu suliniutit nukittorsarneqarnissaat Naalakkersuisut kissaatigaat. Tamatuma saniatigut Kalaallit Nunaata aamma nunani allani oqartussat akornanni paasissutissanik paarlaasseqatigiinnermut naleqqiullugu suliniutit annertusinissaat suli kissaatigineqarpoq.

Akilerartarnermut Aqutsisoqarfik nunani tamalaani attuumassutit pillugit allaffimmik nutaamik pilersitsisimavoq. Allaffimmi suliasat tassaapput nunani tamalaani attuumassutini suliniutinik nakkutillineq akileraarusersuinerlu, kiisalu pingaartumik nakkutilliinikkut paasissutissanik paarlaasseqatigiinnissaq siunertaralugu nunani allani oqartussanik oqartussatigut suleqatigiinneq. Taamaattorli eqqortumik piginnaasaqartumik allaffimmi pisortatut atorfik manna tikillugu sulii inuttalerneqarsimanngilaq, taamaattumik atorfik sivitsunngitsoq inuttassarsiuunneqaqqissaq.

Apeqqut:

6.17 Konto pingaarneq 24.06.10 Erniat tapiissutit, ileqqaaruteqarnissamik aqqissuussineq

- a) *Aqqissuussineq tamanna nittarsaanniarlugu Naalackersuisut qanoq iliuuseqarpat?*

Akissut:

Oqaluttuarisaanermi ileqqaaruteqarnissamik aqqissuussineq pillugu ammasumik Naalackersuisut nittarsaassisimanngillat. Naliliisoqarsimavoq Kalaallit Nunaanni aningaaseriviit ajunngilluinnartumik nittarsaassisimasut, tassa aningaaseriviit aamma erniatigut tapiiffigineqarsinnaasunik siunertaqartunik innuttaasut ataasiakkaat ileqqaarinissaannut soqutiginnimmata.

Apeqqut:

- b) *Aktianik pisinissaq siunertaralugu ernianut tapiissuteqartoqartarpoq – ernianut tapiissutit taakku nunatsinni iluaqutaanissaat qanoq qulakkeerneqarpa?*

Akissut:

Aningaaserivinni ileqqaakkat akileraarutitigut 6. oqilisaaffigineqarnissaat pillugu Inatsisartut inatsisaat nr. 2, 6. maj 1989-imeersumit takuneqarsinnaavoq aqqissuussineq taamaallaat inunnit, Kalaallit Nunaannut tamakkiisumik akileraartartunit, pilersinneqarsinnaasoq, soorlu aamma ileqqaakkanut erniat taamaallaat akileraarusernagit tunniunneqarsinnaasut ileqqaakkat ataavartumik Kalaallit Nunaanni siunertanut atorneqassappata, ilaatigut ingerlatseqatigiiffinni inuussutissarsiortuni piginneqataassutinik il.il. pisinerni. Naalackersuisut taamaattumik isumaqarput ernianut tapiissutit nunami maani iluaqusiinissaat qulakkeerneqassasoq.

Apeqqut:

6.18 Konto pingaarneq 24.10.10 Nuna tamakkerlugu akileraarut

- a) *AIS 15-imi 50 mio. kr.-inik isertitaqartarnissamik missingikkap ataatsimiititaliamit erseqqinnerusumik naliliiffigineqaqqullugu pensionisiassanit iluanaarutinik akileraarusersueriaatsip (PAL-akileraarut) paasisaqarfiginerunissaa ataatsimiititaliamit kissaatigineqarpoq.*

Akissut:

Marloqiusamik akileraartarneq pillugu isumaqatigiissutip allanngortinneqarnissaa pillugu Danmark aamma Kalaallit Nunaat 2012-mi isumaqatigiissuteqarput. Allanguinerup ilaatigut kinguneraa nunat illugiillutik pensionitigut iluanaarutinit akileraarutit imminnut nuuttarnissaannut pisussaaffeqarnerat. Nuussinerni pineqarput nunami allami, innuttaasup najugaqarfiginngisaani angerlarsimaffeqartunik pensionskarsinik aqqissuussinernit iluanaarutit.

Isumaqatigiissutip malitsigisaanik ukiumi isertitaqarfimmi 2013-mi iluanaarutinit tunngasunik Danmark 2014-mi aningaasanik Kalaallit Nunaannut nuussisussaavoq. Aningaasat nuunneqartut 21,4 mio. kr.-inik annertussuseqartut 2014-mi isertitat allanneqarput, taakku saniatigut 1,7 mio. kr.-it tiguneqarput 2015-imi isertitatut allanneqartussat.

Siunissami pensionitigut iluanaarutit pillugit missiliuinissamut annertuumik nalorninartoqarpoq. Tamatumunnga ilaatigut pissutaavoq nunani tamalaani aningaasatigut niuerfinni ineriartornerup annertuumik apeqqutaanera. Taamaattorli Danmarkimi isertitassatut missiliuinerup qummut iluarsinera tunuliaqutarinera PAL-akileraarutinit isertitanut tunngasuni missiliuinerit Naalakkersuisunit qummut iluarsineqarput, tassa aningaasatigut niuerfiit 2014-mi pitsaalluinnartumik ineriartormata taamaalillunilu 2014-mi pensioninit iluanaarutit qaffasinnerunissaat ilimagineqarluni.

Kalaallit Nunaanni pensioninit iluanaarutit akileraaruteqartinneqanngillat. Tamatuma malitsigisaanik isumaqatigiissutip ilaani Kalaallit Nunaat sulii naammassinngilaq.

Apeqqut:

- b) Akileraarutitigut kinguaattoorutini isumakkeerinninnermut aningaasaliissutit 2013-imi piviusunngortinneqartut marloriaatingajaannut amerlassusilerlugit 2015-imi qaffanneqarnissaat soq siunnersuutigineqarpa?*

Akissut:

Kisitsit kinguaattoorutini ineriartornermut Naalakkersuisut ilimagisaannut naapertuuppoq Kinguaattoorutini isumakkeerinninnissamut aningaasat naatsorsuutigineqartut 2014-p ingerlanerani piffissalersuinikkut isumakkeerinninnerit ineriartornerinut assersuussinikkut pissarsiarineqarput. Aningaasat taamaalillutik kinguaattoorutit siusinnerusukkut isumakkeerissutaasunik akiliutinik tigusanik kiisalu isumakkeerinernik sunnerneqartarput, 2013-mut taarsiullugu 2014-mi eqqortumik inissinneqartussat.

Apeqqut:

6.19 Konto pingaarneq 24.10.11 Nuna tamakkerlugu immikkut akileraarut

Sunik tunngavissaqarlutik ingerlatseqatigiiffinnut akileraarutip AI2014-imut sanilliullugu 28 mio. kr.-inik qaffannissaa, tamatumalu kingorna 2017-imi 35 mio. kr.-inik apparnissaa Naalackersuisut naatsorsuutigaat?

Akissut:

Pituffimmiit isertitanut qaffakkiartortunut kiisalu aatsitassarsiornerup iluani ingerlataqannginnermut Naalackersuisut isummorsorput, taamaattumik isertitassat 50 mio. kr.-inik annertussuseqassasut ilimagineqarluni, tassani N2013-imi piviusunngortinneqartunut naapertuuttut.

2017-imut naleqqiullugu isertitassat appariarnissaannik ilimagisaqarnermut pissutaavoq annikinnerusumik isertitaqarnissamik ilimagisaqarneq, pingaartumik Pituffimmi ingerlataniit.

Apeqqut:

6.20 Konto pingaarneq 24.10.12 Ingerlatseqatigiiffiit akileraarutaat, Namminersorlutik Oqartussat suliffeqarfiutaat

- a) *KNI A/S-p, Royal Arctic Line A/S-p imaluunniit Tele Greenland A/S-p ingerlatseqatigiiffimmu akileraarummik akiliinnginnissaannik naatsorsuutiginninnermut tunngavigineqartoq erseqqinnerusumik nassuiaateqarfigineqassasoq kissaatigineqarpoq.*

Akissut:

KNI A/S imaluunniit Royal Arctic Line A/S 2013-mi akileraarutitigut sinneqartoorteqannginneri eqqarsaatigalugu, Tele Greenland A/S-lu immap naqqani kabelip allilernerqarnerani annertuunik aningaasaliisimanerata kingunerisaanik ukiumi isertitaqarfiusumi 2014-mi akileraarutitigut sinneqartoortoqarnissaa naatsorsuutigineqanngilaq.

Apeqqut:

6.21 Konto pingaarneq 24.11.12 Raajanut akitsuut

- a) *Ukiuni missingersuusiorfiusuni isertitassatut missingikkat allanngortinnagit ingerlatiinnarneqarnissaat raajartassiisutit annertussusissaattut Pinngortitaleriffiup kaammattuutaanut naapertuuppat?*

Akissut:

Iluanaarutit 10 mio. kr.-inik qaffanneqarnissaat siunertaralugu AIS2015-imut allannguutissamik siunnersuummik Naalackersuisut saqqummiussinialersaarput, tassa isertitat 120 mio. kr.-iniit 130 mio. kr.-inut qaffannissaat naatsorsuutigineqarmat.

Qaffaaneq biologit siunnersuinerat tunuliaqutaralugu pivog, tamatumalu kingorna naatsorsuutigineqarluni maannakkut raajanut TAC 2014-mi kitaani 85.000 tonsiniit 2015-imi 73.000 tonsinut appartineqassalluni, taakkunanga 4.000 tonsit missaat EU-mut aamma Canadamut tuttussaallutik.

Kiisalu 2014-mi qaammatini kingullerni sisamani raajani tunisinermi akit tunuliaqutaralugit, kiisalu 2015-imi akit ajunngitsumik ineriartornissaat ilimagalugu akitsuut kiilumut 28,00 kr.-inik tunisinermi akeqartitsineq aallaavigalugu naatsorsorneqarpoq aamma akitsuutit procentiat 15-iimmat naatsorsuutigineqarpoq 2015-imi iluanaarutit 130 mio. kr.-iussasut.

Apeqqut:

6.22 Konto pingaarneq 24.11.13 Umiarsualivimmiinnermut akileraarutit

- a) *Umiarsuarnut takornariartaatinut akileraarutip appartineqarnissaanik siunnersuutip tusarniutigineqarneranit tusarniaaffigineqartut susassaqtut pingaarnertut suna oqaatigaat?*

Akissut:

Illuatungerisat tusarniarneqartut siunnersuut naammagisimaarlugu oqaaseqarput. Siunnersuummut akerliusoqangilaq Siunnersuummut akerliusoqangilaq. Aammattaaq inatsimmut siunnersuummut oqaaseqaatinut nalinginnaasunut innersuussisoqarpoq.

Apeqqut:

- b) *UPA2012-imi Inatsisartut UPA2012/60 akuersissutigaat ima qulequtaqartoq: "Angallatit akileraarummik akiliisussaataangitsut ikinnerulersinniarlugit Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit Inatsisartut inatsisaanni nr. 20, 30. oktober 1992-imeersumi § 2-p allannguutissaatut siunnersuummik Naalackersuisut saqqummiuseqqullugit, tassungalu atatillugu pineqartunut akileraarutigineqartussat amerlassusissaannik nalileeqqeqqullugit peqquneqarnissaannik Inatsisartut aalajangiiffigisassaattut siunnersuut." Siunnersuut akuerineqassasoq Aningaasaqarnermut Ataatsimiititaliap isumaqatigiittup inassutigaa, tassami angallatit akitsuuteqartinneqangitsut arlallit umiarsualivimmiinnermut akileraarutininik akiliisariaqartut ataatsimiititaliap kaammattuutigimmagu. Naalackersuisut aappasaaneerinninnermut akissuteqaamminni tamatumunnga isumaqataapput, tamatumalu saniatigut ilaatigut akissuteqarlutik "Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutininik allannguinnissaq siunissami aningaasaliisoqarumaarnissaanut atasumik pisariaqarpoq. Taamaammatt Naalackersuisut naliliipput akileraarutit aqqissuusaaernerat siunnersuusiortoqanginnerani misissorluarneqartariaqartoq". Tamanna tunngavigalugu makku paasissutissiissutigineqassasut kissaatigineqarpoq:*
- i. *UPA 2012/60-imut maanna Naalackersuisuusut qanoq isumaqarpat?*

Akissut:

Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit inatsimmik suli annertunerusumik misissuisoqarnissaanut Naalakkersuisut isumaqataapput, tamannalu siumut sammisut akileraartarnermut akitsuutinullu tunngasuni suliniutinut allanut atatillugu pitsaanerpaamik pisinnaalluni.

Apeqquut:

- ii. *Umiarsuarnut takornariartaatinut akileraarut akileraarutitigut akitsuutitigullu suliassaqarfimi suliniutinut allanut atatillugu appartinneqartussatut siunnersuutigineqarpa?*

Akissut:

Umiarsuit takornariartaatit tikittartut ikiliartorneri aamma Atlantikup avannaani naalagaaffittut umiarsuartigut takornariartarfittut Kalaallit Nunaata unammillersinnaanerunissaanut massakkorpiaq pisariaqartitsisoqarnera tunuliaqataralugu inatsissatut siunnersuut manna saqqummiunneqarpoq. Siunnersuut taamaattumik UPA 2012/60-imi taaneqartup inatsisip misissorneranut akissutaanngilaq.

Apeqquut:

- iii. *UPA 2012/60 naapertorlugu umiarsualivimmiinnermut akileraarutit pillugu kingusinnerusukkut allanngortinneqarnissaa siunnersuuteqartoqassasoq Inatsisartut naatsorsuutigisinnaavaat?*

Akissut:

Akileraartarnermut akitsuutinullu tunngasuni sulianut allanut ataqatigiissillugu umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit ukiuni aggersuni misissorneqarnissaat Naalakkersuisut naatsorsuutigaat.

Apeqquut:

- iv. *Angallatit, tassunga ilanngullugit tingerlaataannarsortut, umiarsualivimmiinneq ajortut akileraarusersuinnermut inatsimmut ilaatinneqarpat aammalu tingerlaataannarsortut maleruagassartaqanngitsumik nunatta imartaani angalaarsinnaappat?*

Akissut:

Umiarsuit, umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit pillugit inatsimmut ilaanngitsut ilaanni umiarsualivimmut tikinneq ajortut imaluunniit avataani kisaqqasut umiarsualivimmiinnermi imaluunniit umiarsuit takornarianik angallassissutit ilaasunik

angallassinerrannut akileraarutinin akiliissanngillat. Umiarsuit akitsuuteqarfimmut isertut (tunnngaviummik titarnermiit 3 sømili) eqqussinermi akitsuutit pillugit maleruagassanut ilaatinneqarput, naak taakku umiarsualivimmut tikinngikkaluartut.

Apeqqut:

6.24 Konto pingaarneq 24.11.26 Avaleraasartuunut akitsuut

Allannguutissatut siunnersuummik avaleraasartuunut kiilumut ataatsimut akitsuutip 0,95 kr.-inut aalajangersarneqarneranik imaqartumik Naalackersuisut saqqummiussinissaannik Aningaasaqarnermut Akileraartarnermullu Ataatsimiititaliap isumaqatigiittup Naalackersuisunut kaammattuuteqarnerata kingorna avaleraasartuunut akitsuutip annertussusissaa UJPA 2014-imi aalajangersarneqarpoq. Tamatuma peqatigisaanik ataatsimiititaliamit oqaatigineqarpoq akitsuut piffissami misileraalluni aalisarnermik ingerlatsiviusumi taamaallaat atuutissasoq.

Tassunga atatillugu ataatsimiititaliaq ima allappoq:

"Tamatuma peqatigisaanik akitsuutit pillugit aalajangersakkat allanngortinneqarnissaat siunertaralugu allatut akitsuuteqartitsisinnaanerup immaqalu assigiinngisitaartumik akitsuuteqartitseriaatsimik atuilernissap aningaasatigut kingunerisassaas pillugit nassuiaammik misileraalluni aalisareernerup qaangiunnissaa sioqqulluarlugu Naalackersuisut suliaqarnissaat ataatsimiititaliamit ilanngullugu kaammattuutigineqassaaq. Avaleraasartuunik aalisarnerup ataatsimut isigalugu inuiaqatigiinnut aningaasatigut kingunerisai allat, tassungalu ilanngullugu akileraarutitigut isertitat, nassuiaammi aamma ilaatinneqartariaqarput."

Oqaluuserisassaq taanna pillugu isumaliutissiisummini siullermi ataatsimiititaliaq ima allappoq:

"Avaleraasartuunik aalisarnermut ataatsimut malittarisassanik, imminut akilersinnaasumik aalisarnissami sinaakkusiisunik, Aningaasaqarnikkut Ingerlatsineq pillugu Nalunaarusiaq 2014 naapertorlugu Naalackersuisut saqqummiussinissartik pilersaarutigigaat ataatsimiititaliamit maluginiarneqarpoq. Tassunga atatillugu nungusaataannngitsumik aalisarnissap malittarisassiornissami ilanngullugu isumaliutigineqarnissaa ataatsimiititaliamit kaammattuutigineqassaaq.

Ataatsimiititaliap isumaa malillugu akitsuuummik aalajangersaanermi makku immikkut isiginiarneqartariaqarput:

- Akitsuuseeriaatsikkut nunatsinni suliffissaqartitsiniarneq tunisassiorfinnilu piginnaasanik ineriartortitsineq annertunerusumik siuarsarneqartariaqarput,

- Nunat allamiut aalisariutaannik isumaqatigiissuteqarnerni sapinngisamik annertunerpaamik pisaqartarnissap qulakkeerneqarnissaa pingaarnertut siunertarineqassasoq, aamma
- Aalisakkanik pisuussutit nunatsinni inuiaqatigiinnut aningaasaqarnikkut sapinngisamik annertunerpaamik iluanaarutaanissaat akitsuuseeriaatsikkut qulakkeerneqassasoq.
- Aammattaaq piffissaq qanittoq isigalugu akitsuutinit 90 mio. kr.-inik iluanaarutissatut missingikkat akitsuuseeriaatsikkut pisariaqanngitsumik ajorseriartinneqannginnissaat ataatsimiititaliamit pingaartinneqarpoq.”

a) Siuliani allassimasut naapertorlugit misileraalluni piffissaq ingerlaffissaa pillugu Naalakkersuisut qanoq naatsorsuuteqarpat?

Akissut:

Aalisarnermut, Piniarnermut Nunalerinermullu Naalakkersuisoqarfimmiit akissutitut innersuussisoqarpoq.

Apeqqut:

b) Aalisartut nunatsinneersut immikkut isiginiarlugit avaleraasartuunik aalisarnermi assigiinngisitaartumik akitsuuteqartitsisinnaaneq eqqarsaatigalugu Naalakkersuisut qanoq isumaliuteqarpat?

Akissut:

Ikerinnarsiorluni aalisarnermi aalisarnermi akitsuuteqartitsineq 2016-imiit eqqunneqarnissaa piareersarneqarpoq aalisarnermik inuussutissarsiuteqartut oqaloqatigereernerisigut. Kalaallit sulisut piginnaasatigullu ineriartortitsinerup siuarsarnissaa siunertaralugu akitsuutit allanngorartuunissaat pilersaarutaavoq, angallatit kalaallit nunaanneersut angallatinit nunanit allaneersunit attartorneqartunit appasinnerusumik akitsuummik akiliisassallutik.

Apeqqut:

6.25 Konto pingaarneq 24.13.50 Akileraartarnermi akitsuusiisarnermilu isertitaqarnerulernissamat sillimmatit

Thule Air Base pillugu maanna suliamut allakkiamik ataatsimoortumik suliaqartoqarsimava? Taamaattoqarsimappat allakkiap tamatuma assilineqarnera qinnutigineqarpoq. .

Akissut:

Naalakkersuisut ilisimatitsissummik isertuussassamik ataatsimiititaliamut novembarip 27-ani 2014-mi nassiunneqartunut innersuusserusupput, taanna Pituffik pillugu suliaq ingerlasoq pillugu kisitsisinik ilisimaneqartunik imaqarluni.

Taamaalillunga neriuppunga 2015-imut Aningaasanut inatsisissamut siunnersuummut
Aningaasaqarnermut Ataatsimiititaliap aallarniutaasumik apeqqutaanik
oqaaseqaataanullu naammaginartumik akissuteqarlunga.

Inussiarnersumik inuulluaqqusilluta

Andreas Uldum